

HEBREO PUEYACUARA NAAJIONEE

Pueyasoori pajaniyara na rupaa pohuataniquiaari Neyanujiniji

1 ¹Tariucuacaanu, Pueyasoori pueyara-
caanu na sequenu panishano
caminiujiuniasa pueya poojotaniquiaari pa
supuetanaara. Nojuajaari nojuajiniji
caminiujiuniasa mijiotequiaari queraatia
tamaatia casaa, nojori na niishitiniuria
casaa nojuaja sequenu paniriquiaa nojorini.
²Quiari naataja saniniuuja, Pueyasoori
tama Neyanujuaaja pohuataniquiaari na
sequenu panishano pajaniyara. Nio Neyanu
shipinitiquiaari puetunu casaajanaacuajaari;
nio jiya, jiya cajiniocuajuhua, puetunu pa
niquiyaquishoo casaajanaanio. Naajuhua,
Pueyasoori Neyanu jiyatequiaari puetunu
tama na shipinishanojuanaa jitianaa
quiriquiano. ³Neyanuuri tojetaarucujanaa
maninia, juhua na Quejuhuaj, juhua na Que
niquishanojuhuaj. Naacuajitij, nojuajaari
jiyanohua shacantuuca cumaacaracajuhua.
Naacuajitij, nojuajaari puetunu na
shipinijosano casaajanaa rucuanetequiaa
maninia, saa na rupaa cumaacataja.
Nojuaja jaara cusoquiaari puetunu sesa pa
miishanojuanaa na tuujunura, na nuhuaji,
jiyocuacaanu tacaquiaariuhuari, na Que
Pueyasoo miaquetajara na cajiniuria
Jiyaniijiajanaa quiquiojinia.

Pueyasoo Niyanuuri Jiyaniijiajanaa cutara Pueyasoo seyajiniji

⁴Naacuajitij, Pueyasoo Niyanuuri
Jiyaniijiajanaa quiquiaari Pueyasoo

seyajiniji. Nojuajaari na Que sesaanucua.
⁵¿Pueyasoteeri quenaaja tamonu na
seyajinijinio sequequiaari: “Nioori cua
Niyanu”? ¡Maja! Neyanu sequequiaari
cutaraari:

“Quiaari quiyanu. Janiyari pueyanora
quia muerateree jiyacuani, cua
saquirijosano pueya Jiyaniijia
quia quiniuria”.

Neyanujiniji sequequiaarijaariuhua:

“Nera, janiyari na Queni. Quiria
saniniuuja, nojuajaari quiyanu”.

Pueyasoori maja quenaaja niquiriyatu na
seyajinijinio naa na sequenu quiquiaari.

⁶Tariucuacaanu Pueyasoo Rupaaajinia, naa
naajiotasaaquiaariiri casaa Pueyasoo
sequenutaniyani, Neyanu na tiuquitisha-
cariuhua mijiria, Jiyaniijiajanaa na
quiniuria:

“Puetunu cua seyajanaa cuara
Quiyanu tojitiaara, Jiyaniijiajanaa
na quiniucua”.

⁷Pueyasoo seyajiniji saniniuuja, naa
naajiotasano quiyari tariucuacaanu
Pueyasoo Rupaaajinia:

“Pueyasoori na seya jataniquiaa
juhua paratura, juhua maniriano,
na panishano nojori miiniuria”.

⁸Neyanu sequeya saniniuurija:

“Quiyanunaa, quiaacuajaari Pueyasoo-
juhanaj. Quiaari Jiyaniijia.
Quiaari naa quiniutianiya pueyara-
caanutej. Quiaari
cumaacaracajuhua, maninia quia
jitianura puetunu pueyajanaa.

⁹Quiaari maninia miiniu porocua. Quiaari sesa miiniu soojea saniniuuja. Cunora, Pueyasonaa, janiyari quia jiyatequiaari Jiyaniijajanaa quia quiniuriani, quia Jiyaniijia cua quiniuucua. Janiyari quia jiyatequiaarijiuhua socua shuquiriaatia quijia quia quiniuria puetunu quia cojiniaajiniijijianaa”.

¹⁰Pueyasoori naa sequequiaari Neyanujuhaj:

“Jiyaniijianaa, quiaacuajaari coteenujuanaa casaa shipinijia. Quiaari jiya shipiniquiaari, puetunu jiya cajiniocua niquishano casaajanaanio. ¹¹Puetunu quia shipinishanojuanaari shaajeriquianohua. Quiajaniya saniniuuja, quiaari pueyaracaanu quiriQUIANO cutara. Puetunu quia shipinishano casaajanaari tariucushiriquiano juhua toqueja. ¹²Naa na tariucushishacaritij, quiaari juhua toque mocua na jiunioriquiano, quia jatasocoriquiano. Quiaari naa miiniutianiyaquij taa pueyano jocuaquiaacuaa na toque mocua-cuaani, quiariqui toque na cushiniuria saniniuuja. Quiajaniya saniniuuja, majaari quia jatanu quiniutianiya tamaatiara. Quia quiniuuri maja puequeriquiano”.

¹³Pueyasoori Neyanu sequequiaarijiuhaj:

“Miji, cua miaquetajara quia cajishii, janiya jaara quia paraa shocojotare puetunujuaaajaatijia, maja quenaaja niquiriyatu cureenura na miananajonura quiajaniya”.

Majaari naa Pueyaso sequenu quiquiaari quenaaja niquiriyatu na seyajiniinio.

¹⁴Puetunu nojorijianaacuajaari Pueyasora poonijionaa. Pueyasoori nojori jiyaramiquiquiaa Jesuucua tiuuriquiano pueya nojori cojuanura.

Maja cumaati Jesucristo tojiyashijiacara pa quiniu

2 ¹Naaratej, Jesucristojiniji pa tojishano tojiijaca pa quiriQUIA socua, paa mariqui Pueyasocuaaji rupatereeri. ²Tariucuaacaanu, Pueyaso seya caminiujiushano Pueyaso rootasano pueyarani, cuno rootasanoori seetanujuaanaa pueya tojishocoriquiano cutara. Cuno rootasano ruuretajaca, na miyashijiacajuhaj, nojoriiri saniitosaaquiaari.

³Pueyaso seya caminiujiushano tojiyashijiaca jaara saniitosaaquiaaricuaa, ¿paateeri jiyaniyani Pueyaso pa jiyanooniutianiya juhujaniya Neyanu rupaa tojiyashijiaca pa quishacari? ¡Maja! Cuno rupaa nocua pa tiuushano pa jiyanooshaanurani, cunoori pa Jiyaniijajanaa pohuatasano. Pa Jiyaniijia nuhuaji, cuno pojori, canapuede pa Jiyaniijajanaa tojiQUIAARI pueyaracaanuni, nojoriiri saniniuuja cuno rupaa caminiujiuQUIAARI pajaniyara. Canaa sequetiquiaariiri nojori tojishanoori seetanu rupaaajanaa.

⁴Naajuhuj, nojori pohuatasacari Jesucristojiniji, Pueyasoori nojori miitiquiaari jiyajeneta casaa jyanohua na cumaacata, maatia pueya niishiniuria nojori pohuatasanoori seetanujuaanaa. Pueyari cunora jyanohua shiriquitiuiQUIAARI queraatia Pueyaso cumaacata miishano nojori niquishacari. Naajuhuj, Pueyasoori Jesuucua tiuuijaca niqutitiquiaa na Sohuanu, tamaatia pa miiniuria na cumaacata, taa na paniyacuajani. Cunora, paa cumaati seetanujuaanaa Pueyaso rupaa Jesucristojiniji tojitiajaca quiyani.

Jesucristo mijiria rasaQUIAARI pa puerana na quiniuria

⁵Cuno quiarinio jiyaranojiniji teyano pa sequeriquiaacuajani, Pueyasoori maja na seya na jiyatenu quiquiaari cuno

quiarinio jiya jiyaniijianucuarano nojori quiniuria. ⁶Naajaa, tariucuacaanu Pueyaso Rupaajinia naa naajiotasaaquiaa-riiri pueyano nequesotasano Pueyaso:

“Pueyasonaa, ¿casaateeri pueyanoni, nocua quia niishiriojonurani? ¿Casaara quia taraajeya pueyacua-ni? ⁷Quiaacuaajaari na shipiniquiaari rupaquijiara socua cumaacaaju na quiniuria quia seyajiniji. Naajaa, quiaari na jiyatequiaari jiyaniijia na quiniuria, cumaacaraca quijia na quiniuriajuhuaj. ⁸Quiaari na sequequiaari puetunu quia shipinishano casaajanana jiyaniijia na quiniuria”.

Naa Pueyaso sequesacari pueyanotej, puetunu na shipinishano casaajanana jiyaniijia na quiniuriatej, naacuaajitij, majaari quenaaja niquiriyatu casaa cureenu quiniutianiya na jiitiasoo. Saniniuuja, paacuaajaari niishijani, pueyanoori juhuanajuaja maja seetanujuanaa cumaacaraca na quiniu puetunu casaajanana na tojitiniuria tama nojuajaa-ja. ⁹¿Jesuuriyataj? Pueyano na quiniuria, na Que Pueyasoori rupaquijiara na miiquiaari socua cumaacaaju na quiniuria na seyajiniji. Naacuaajitij, pueyano na quishacari, Pueyaso taraajenuucua puetunu pueyacajanana, Neyanuuri mosaacuarara pocuara. Naa na cusuucua pocuaratej, Pueyasoori na jiyatequiaari Jiyaniijiajanana na quiniuria, jijanohua cumaacaraca na quiniuriajuhuaj.

¹⁰Jamueyashijia Pueyaso quiniuucua, nojuajaari puetunu na muerasuranajuanaa panitiaquiaari na cojiniaa nojori quiniuria. Paniquiaariiri jatiqui nata shuquiriaatia pa quiniuria, puetunu tama nerajaaja na shipinishano casaatajanaaju-huaj. Jeenucuasano pa quiniuria pa cojiniuria Pueyaso, nojuajaari jijanohua

maninia miiquiaari pocuara, Neyanu na miitishacari naquiya pa niti. Naacuaajitij, Neyanuuri tojetaarucujajanaa maninia quiquiaari Pueyaso muerasuranooquaji Tacuna na quiniuria. ¹¹Jesucristo jeequenuucua pajaniya sesa pa miishano-jiniji, jatanishano pueya pa quiniuria, paari cunora seetanujuanaa Pueyaso muerasuni. Naacuaajitij, Pueyasoori pa Que, taa pocuaji Tacuna Que na quiyacuaani. Cunora, Jesucristoori maja na caririquiniu na Que na sequenura pajaniyajiniji, “cua tapueyocacata”.

¹²Tariucuacaanu Pueyaso Rupaajinia naa naajiotasano quiyacuaajaari na sequesano na Que:

“Cua Quenaa, janiyari cua tapueyo-cuaca pohuatanutaniyani taamuecate quiajaniyani. Janiyari quia saquiriojosano pueya niquiara quia jaaquequejotanutaniyani cua shuquiritiasacari quiajaniya”.

¹³Tamaqui, Jesu sequesanoori naa naajiotasano quiyajuahuaj:

“Janiyari cua Queecua tiuuja quiniutianiyani”.

Naacuaajitij, mijiria na quishacari, Jesuuri na Que Pueyasooqua tiuuquiaaricuaa taa pa tiuuquiaa nocuanijia. Socua naa naajiotasano quiyari tamaqui taa Jesu sequenutaniyani, jiyocuaaanu na tiuquiritiasacari pajaniya na shuquiriniutia:

“Nio pojoriiri cua Que jiyatesano cua tapueyocacara, nojori tojitianuu-cua janiya”.

¹⁴Cuaqueyaraca pa quiniuucua, Sesaacaari cumaacaraca quiquiaari na shaajanura pajaniya, Pueyaso tojtiaashijia pa quiniuucua. Naaratej, Jesuuri cuaqueyaraca na quiniuria jataquiaarijuhuaj, taa pajaniyacuaani. Naacuaajitij, nojuajaari na naata mosaanu quiquiaari pa niti. Naacuaajitij, nojuajaari Sesaaca jaariuutiaquiaari pajaniya. ¹⁵Naacuaajitij,

nojuajaari juhuajaniya quijiacara jiyatequiaari pajaniya, nocua pa tiuuniucua. Paari niishiyacuajani, pa cusosacari, paari pa Jiyaniijia quiniuria quianutaniyani. Cunora, majaari tari pa puerenu pa cusonura. Nocua tiuyashijia-ca pueyari seetanujuanaa cusonu puerejaca cutara. ¹⁶Seetanujuanaa, majaari Jesucristo niniu quiquiaari Pueyaso seya na naacunura. Niquiaari cutaraari pueyacuaji na tacunura, noo pojoriicua, nocua tiuuiacate taa supueta-na Abraham quiquiaari Pueyasoocua tiuuiacuanaa. ¹⁷Maninia pa naacuna na quiniuria, Jesucristoori puetunu naquiya miiniujianaa rejeretaquiaari mariyata taa narta pueya miishaaquiaacuanaa. Naacua-jitij, nojuajaari pocua taaajeja, pocuaji na tacunura Pueyaso. Taraatia pa miiniu niishijia na quiniucua, pa naata nocua tiuuniu pueyaracaanu na Que Pueyaso na jiyanootiniuria pajaniya, sesa pa miishanojiniji. Na cusonuucua, naacuajiti Pueyasoori na naata pa jiyanooni puetunu sesa pa miishanojinijianaa. ¹⁸Mijiria na quishacari, nojuajaari pueyaracaanu taraatia miishaaquiaari. Nojuajaari jiyanoohua saniniujiushaa-quiaari sesa na miiniuria juucujahuaj. Naacuajitij, nojuacuajaari jiyanoohua niishijia na cumaquiniuria pajaniya, paa jaara sesa miiniuria saniniujiushaariquia-ni, paa jaara taraatia miishaariquiajuhuaj.

**Jesucristo cutaraari
Jiyaniijijanaa Moisésjiniji**

3 ¹Cuarta Pueyaso pueyanaa, niaacua-jaari Pueyaso saquiriojosano tama na pueyajaaja nia quiniuria. Nojuajaari Neyanu Jesu jiyaroquiaari na rupaa na niishitiniuria pajaniya, Pueyaso pueyara pa jatanishaanura. Neyanuuri na jiyanoo-tijia pajaniya, nocua pa tiuushacari. Cunora, jaciaa pa niishiriojore socua

Jesucristojiniji. ²Mijiria na quishacari, Jesuuri na Jiyarona tojjia quiquiaari pueyaracaanu, taa Moisés* quiquiaari Pueyaso tojjiacuaani, Israel pueya jiitiana na quishacari. ³Naajaa, Jesucristo cutaraari Jiyaniijijanaa Moisésjiniji. Moisésri saaja narta Pueyaso pueyajinijio pueyano quiquiaari. Saniniuuja, Jesucristoori puetunu Pueyaso pueyaja-naa shipininia cutara. Naaratej, Jesucristo cuaara tojishaaria socua cutara. ⁴Puetunu pueyapuejanaari supuetanaaraca. Naajaa, Pueyasojuanaari nojori shipininia seetanujuanaa. ⁵Naacua-jitij, Moisésri pueyaracaanu Pueyaso sequesano caminiujuquiaari Pueyaso saquiriojosano narta Pueyaso pueyara, maninia Pueyaso seru na quiniucua. ⁶Saniniuuja, Jesucristoori Pueyaso Niyanjuanaa cutara. Nojuajaari Pueyaso saquiriojosano pueya Jiyaniijijanaa. Nojuajaari nojori jiitiaa saa maninija, taa na Que paniyacujani. Naaratej, majaari pa cartenu Jesucristo rupaa. Paa jaara Jesucristoocua tiuquiaani, naajuhuj, paa jaara shuquiriaatia na sashiquiaa na rijionura pajaniyani, naacuajitij, paari niishiyani paari seetanujuanaa Pueyaso muerasuni.

Pueyasoori na pueya samaraataja

⁷Pueyaso pueya pa quishacari, Pueyaso Sohanu sequesano pa tojiri, maja pa rupatenura Pueyaso Rupaacuaji. Na sequesanoori naa naajiotasano quiya tariucuaanu Pueyaso Rupaajinia pajaniyarajuhuj:

“Pueyanaa, niaa jaara quiarijia tojiriquia Pueyaso sequesano nijaniya, majaari na sequesano ruuretajaca nia quiniu. ⁸Majaari naa nia quiniu taa nia supuetanaa quiquiaaricuaani, cariquia jiyajinia nojori camarucuneejota-sacari pueyaracaanu. Nojoriiri

Pueyaso juaatijiojuaca quiquiaari, pueyaracaanu na tojiyashijiaca nojori quishacari. ⁹Nojoricuajaari pueyaracaanu cua cumaacata cua mijiosano niquituiquiaari. Cuarenta marijaari shocojoquiaari, pueyaracaanu jiyajeneta casaa cua mijiosacari cua cumaacata, maninia cua jiitiasacari nojori. Naajaa, nia supuetanaari cua juaatijioquiaari, pueyaracaanu nojori taacanuusacari cucuaji.

¹⁰Janiyari cunora seetanujuanaa juaaquiaari puetunu cuno pojortiajanaani. Naaratej, janiyari sequequiaarini: ‘Nojoriiri juhua cucuaji tashuquioono rucoojiya tamajaaja. Nojoriiri cua niishitiojosano ruuretaquiaa saaja’.

¹¹Janiyari cunora jiyanhua cua juaaniutia naa sequequiaarini: ‘Majaari nojori ruپueni quiniutianiya janiya, shuquiriaatia cua quishaqui, cua samaraatanura nojori, pueyaracaanu shuquiriaatia quijiaca nojori quiniuria cuata’”.

¹²Naarate cuarta Pueyaso pueyanaa, tama nia cuaqueyajaaja nia cojuare jiyanhua, niaa mariqui Pueyaso Rupaacua tiuyashijiacara quiriohuari, Pueyasocuajaji nia rupatenura puetunujuanaa. Pa Pueyasocuajaari quijiajuhanajaj. Nojuajaari na tojiyashijiaca saniitiojua.

¹³Cunora, seetanujuanaa Pueyaso Rupaa tojtiajaca nia quiniuria, puetunu juucajanaa nia shiniujiutiooriquia pueyaracaanu. Naa nia miiriquia nio pa quishacari Pueyaso jiyanooni puequeyaquishacarijia taa na Rupaa sequeyacujani. Naa nia shiniujiutiooriquiatej nia jiitiyaquiniucujaji sesa miiniuria. Saniniuujia, niaa jaara sesa mijjiaca quiriquia, tama sesa nia miiniujaarijia nia sapojonutaniya Pueyaso tojiyashijiacara nia jatanuhuara.

¹⁴Jesucristoocua pa tiuuniucua, paari na

cojiniaara jiyatesanoni. Naacuajitij, puetunu na jiitiasanojuanaari puera quiriquianojuhuaj, paa jaara nocua tiuuquiaa pueyaracaanuni, taa shushajanaa seetanujuanaa nocua tiuujiaca pa quiriquiaacuajani.

¹⁵Cunora, naa naajiotasano quiyari tariucuacaanu Pueyaso Rupaajinia:

“Pueyanaa, niaa jaara quiarijia tojiriquia Pueyaso sequesano nijaniya, majaari na sequesano rejetejaca nia quiniu, taa nia supuetanaa quiquiaaricuani. Nojoriiri Pueyaso juaatijiojuaca quiquiaari, pueyaracaanu na tojtiaashijiaca nojori quishacari”.

¹⁶¿Canaputeeri cuno pojorini, Pueyaso tojtiaashijiacani? ¿Secaja pueyatee? Maja. Puetunu noo pojoricuajaari Egipto jiyajiniji Moisés mashiquishano pueyatej. Nojorijianaacuajaari Pueyaso tojiquiaari pocuaano. Naajaa, nojoriiri saaja na ruuretajaca quiquiaari. ¹⁷Nia niishiritioj, ¿canapute cuno pojorini, Pueyaso juaatijioquiaarini, pueyaracaanu nojori camarucuneejotasacari cariquia jiyajinia-ni? Noo pojoricuajani sesa mijjiacatej. Nojoriiri cunora cusonuquiaari nojori quiojosacari nucuaco cariquia jiyaco. Na cusonuusaquijia jamojosaaquiaariiri.

¹⁸Nia niishirijihuaj, ¿canapue naa Pueyaso sequequiaari seetanujuanaa na juaaniutiani: ‘Majaari nia tiuquitianu quiniutianiya niaarano cua niquitionu panishano jiyajinia, tii juhuajaniya shuquiriaatia nia quiniuria cuata’”? Puetunu Pueyaso tojtiaashijiacajanaacuajaari na sequesaaquiaaritij. ¹⁹Naacuajitij, paacuajaari quiarijia maatia niishiyani, Pueyasooocua tiuyashijiaca nojori quiniucua, majaari nojori tiuquitianu quiquiaari Pueyaso niquitionu panishano jiyajinia.

4 ¹Pueyasocuajaari pa masuyajaa panaatia pa quiniuria nata. Cunora, jiyanhua pa cojuare tama pa cuaqueya-

jaaja Pueyaso sequesanoocua pa tiuuniuria, tamonu pajaniyajiniinio mariqui jiyano yaquishaareeri. Na sequesanoocua tiuyashijiacaari maja na ruپenu quiniutianiya Pueyaso, shuquiriaatia na quiniuria Pueyasota. ²Pueyaso rupaacujajaari tari pa niquiara pohuatasaquiarijiuhaj, nocua pa tiuuniuria, taa pa supuetanaa niquiara na pohuatasaquiaricuaani. Nojoriiri Pueyaso rupaa tojiqiaari najuhuanaj. Majaari nocua na tiutuiniu quiquiaari. ³Cunora, Pueyasoori pa supuetanaajiniji naa sequequiaari:

“Cua sequesanoocua nojori tiuyaquinuucua, janiyari cunora seetanujuaanaa naa sequequiaari cua juaaniutiani: ‘Majaari nojori tiuquitianu quiniutianiya cua niqutionu panishano jiyajinia, cuata nojori quiniuria shuquiriaatia’”.

Pajaniya saniniuujia, Jesuucua tiuujiaa pa quiniuucua, paa cutaraari panaatia quijiacara jatanishanoni, pueyaracaanu Pueyaso rupuejaca pa quiniuria. Pueyasoori naajuhaj: jiya shipininiu na tucuatano nuhuaji, nojuajaari panaatia quiya. ⁴Cunora, tamaqui tariucuacaanu Pueyaso Rupaajinia, naa naajiotasaa quiaariiri:

“Seis juucajinia Pueyaso tucuatasaari puetunu na poonijosanojuanaa, na nuhuaji nojuajaari séptimo juucajinia samaatequiaari”.

⁵Pueyaso sequesanoori tariucuacaanu na Rupaajinia naa pacutejosaaquiaari naajiotanu:

“Majaari cua tojtiaashijiaca ruپenu quiniutianiya janiya, panaatia nojori quiniuria cuata”.

⁶Naa sequesanojinijitij, maatia niishishiyari Pueyasoori pueya masuyajaa, nojori rupuenura nojuaja, panaatia nojori quiniuria nata. Noo pojori, coteenujuanaa

Pueyaso Rupaa pohuatasaquiaritij, nojoriiri maja panaatia quijiacara na jatanishaanu quiquiaari, Pueyaso tojtiaashijiaca nojori quiniuucua. ⁷Naa Pueyaso panitianuucua pueya, shuquiriaatia nojori quiniuria natajuhuaj, nojuajaari quiarijia masuyajaa pueya. Cunora, jiyano hua Moisés nuhuaji, Pueyasoori supuetana David naajiotaniquiaari pajaniyara saniniuujia. Naa sequeyari:

“Niaa jaara quiarijia tojiri Pueyaso rupaa, Pueyaso sequesano niaraano, majaari na ruuretano”.

⁸Supuetana Moisés shaajenu nuhuaji, supuetana Josué cutaraari Israel pueya tiuquitianiquiaari nojoririano Pueyaso niqutionu panishano jiyajinia. Naajaa, nojori tiuquitiasacari cuno jiyajinia, majaari seetanujuaanaa panaatia quijiacara nojori jatanishaanu quiquiaari. Cunoori quiquiaari Pueyasooocua tiuyashijiaca nojori quiniuucua juhuaj, taa nojori supuetanaa quiquiaaricuaani. Naacujitij, cuno jiyajinia Josué tiuquitiasacari nojori, majaari panaatia quijiacara nojori jatanishaanu quiquiaari. Nojori jaara panaatia quijiacara tari jatanishano quiri quia, ¿Pueyasotucua casaara quiarijia pa masuuri quiaja Jesuucua pa tiuuniuriani, seetanujuaanaa panaatia quijiaa pa quiniuria natani? ⁹Naacujitij, paacujajaari niishiyani, Pueyaso pueyanoori panaatia quijiacara jatanishaanutaniya, shuquiriaatia pa quiniuria Pueyasota pueyaracaanu. ¹⁰Naacujitij, cante Jesucristoocua tiuujiani, nojuajaari panaatia quijiaa jatanishaanutaniya. Majaari socua na tacaaniu quiniutianiya taa tama na cuaqueyajaaja na jyanootiniutianiya Pueyasoni. Naacujitij, nojuajaari juhuajaniya quijia quiniutianiya, tarijia najuhuaana na poonijosanojiniji, naatej, taa Pueyasojuaanaa samaatequiaari na poonijionu nuhuajicuaani. ¹¹Naaratej,

panaatia pa quiniuria Pueyasota, seetanu-juanaa na Rupaa tojiyacara pa quiri- quia quiarijia. Naa na rupaa tojiyaca pa quiri paa mariqui saniitosaaereeri taa pa supuetanaa Israel pueya saniitosaaquiaa- ricuaani, Pueyaso sequesano tojiyashijiaa nojori quiniuucua.

¹²Pueyaso Rupaari samiitianijia, cumaacaracajaariuhua pueya jiuujiajinia na poonijionura. Pueyaso Rupaari jiyano- hua socua shamatucujaja nijiniaquetucujaja mueruujiniji. Nijiniaquetucujaja mueruuri saaja na naata pa cuaqueya jiyatanu. Pueyaso Rupaa cutaraari pa sohanu tohuariquii- jia, pa niishitijia tohuariquii- jianio. Na naata cuhuatanu poojiajinia jiyasohuaja pa niishiriojosano casaa, poojiajinia pa niishishoo casaanio. Naacuajitij, Pueyaso Rupaari poojiajinia sesa casaa pa niishiriojosano nequesoreeja, jiyasohuaja pa miiniu panishano poojiajinia pa niishiriojosanonio. ¹³Puetunu Pueyaso shipinishano casaajanaani, majaari na cureenu quiniutianiya na nequesoreya- quishoo. Majaari quenaaja niquiriyatu jamaaniu quiniutianiya nocuaji, nequeso- reeso na cureenura. Nojuacuajaari maatia niishiya puetunu pa miishanojua- naa, puetunu pa niishiriojosanojuanaanio.

Jesujuaanaari Pueyaso jiyanoootijia pueya

¹⁴Pueyaso Niyanu Jesuni, nojuajaari na Que jiyanoootijia pajaniya. Nojuajaari jiya cajiniocua tohuariquiiquiaari na Queecua na tiuquiniuria. Nojuajaari quiarijia tii pocuara secojiya na Que. Naacuajitij, Jesucristoocua tiuujiaa pa quiniuucua, maja cumaati pa pishiniu nocuaji. Paacuajaari na muerasuniyojuani. ¹⁵Jesu, Pueyaso pa jiyanoootijiani, nojuacuajaari pocua taraajenu niishijia paa jaara saniniujiushaariquia sesa pa miiniuriani. Nojuacuajaari naa saniniujiushaaciaa-

jiuhua sesa na miiniuria juucua, naate taa pa saniniujiushaaciaa- quiaa- quiaa. Maja cutaraari sesa na miiniu quiquiaari quenaaja. ¹⁶Cunora, pa jiyanoojia Pueyaso pa rupueriquia pa puereyaqui- niutia. Nojuacuajaari pa tojiquiaa pa secojosacari nojuaja, na jiyanooniuria pajaniya sesa pa miishanojiniji. Ritia pa cumaquiquiaa- quiaa- quiaa, pa rejeretanura paa jaara sesa miiniuria saniniujiushaari- quiani.

5 ¹Puetunu pueyacuara* secojonaa jiyaniijiajanaari pueyaracaanu narta pueyajiniinio saquiriojosano pueyano quiquiaa, taa Pueyaso niishitiquiaari supuetana Moisés- cuajani. Nojuajaari jiyatesaaquiaa pueyacuaji na tacunura Pueyaso. Naacuajitij, nojuajaari nareja pueya niqitiojosano Pueyasorano masejojua. Naajuhua, pueya jaara sesa miiri, pueyacu- ara secojonaari pueya seya nanaca shootequiaa, Pueyaso jiyanooniuria nojori, sesa nojori miishanojiniji. ²Pueyacuara secojona quiniuucua pueyanojuhua, nojuajaari sesa miijiajuhua. Naacuajitij, nojuajaari na naata narta pueyacu- ara taraajenu, sesa nojori miishacari, nojori niishiyaquishacari maninia miiniujiuhua. ³Naacuajitij, nojuajaari tama nocuarajaaja seya nanaca shootequiaa sesa na miiniuucua, taa na miiquiaacuaa narta pueyacularani, sesa nojori miishacari. ⁴Niaacuajaari niishiya, majaari quenaaja tamonu pueyano na naata tama na cuaqueyajaaja jiyatenu pueyacuara secojona na quiniuria. Pueyaso- juanaacuajaari tamajaaja saquiriojojua na panishano pueyano, cuno pueyano quiniuria pueyacuara secojona. Pueyasocuaajaari naa saquiriojoquiaaricuaa Moisés tarajanu Aarón*, pueyacuara secojonaa jiyaniijia na quiniuria. ⁵Naajuhua, Jesucristoori maja tama na cuaqueyajaaja na jiyatenu quiquiaa- ri pueyacuara secojona na quiniuria, Pueyaso na jiyanoootiniuria pajaniya. Tama Pueyasojuaarijia na jiyatequiaari pueyacuara

secojona na quiniuria. Nojuajanaacuaajaari naa sequequiaari Jesu:

“Quiaari quiyanu. Janiyari pueyanora quia muerateree jiyacuanu cua saquiriojosano pueya Jiyaniijia quia quiniuria”.

⁶Pueyaso sequesanoori tamaqui tariucua-caanu na Rupaajinia naa naajiotasano quiyajuhuj:

“Pueyaracaanu rishijia quia quiniucua, quiaari pueyaracaanu pueyacuara secojoriquiano cutara, taa Melquisedecuaani”.

⁷Naa pueyano na quishacari mijiriatej, Jesucristoori jiyanoehua saniniujiushaaquiaari. Naquiya na miyaquishaanuucujaj juucua, nojuajaari na Que Pueyaso secojoquiaari jiyanoehua na nujuquenuta. Jiyanoehua martequiaariiri na Que na secojosacari, maja na mosaanura. Nojuajaari niishiquiaari na Que na naata nocua tاراajenu, maja na mosaanura. Naajaa, na Que tojjijia na quiniucua, na Que sequequiaariiri: “Naajaa, quia miiri quia panishano cua Quenaa, taa quia panitiaquiaari miiniu janiyacujani”. Na Queeri na tojiquiaari. ⁸Jesucristoori seetanujuanaa Pueyaso Niyanu quiquiaari mijiria na quishacarijuhuaj. Naajaa, na niishishacari nojuajaari jiyanoehua naquiya miishaanutaninya nojuaja jaara na Que tojiri, naajaa, nojuajaari saaja na tojiquiaari. ⁹Naacuajitij, tojetaarucujanaa maninia mijijia na quiniucua, nojuajaari pueyacuajaj Tacunara quiquiaari, puetunu na tojtiajajanaa na jiyatenura pueyaracaanu rishijiacara. ¹⁰Cunora, na Que Pueyasoori na jiyatequiaari pueyacuara secojona na quiniuria pueyaracaanu, juhua Melquisedec*.

Jiyanoehua puereetaari Jesu tojiniu tarinitianu

¹¹Janiyari queraatia socua nia niishitiojonu paniya Jesucristojinijini, nia niishiniuria nojuajaari seetanujuanaa

juhua Melquisedec. Cunoori puera jiyajeneta, maatia cua niishitiojonura nijaniya, juhua niishiyashijiacara na quiniuuquiohua. Niaacuajaari tari niyajetarucuaa tariucuaaanu nia tojishano. ¹²Tariucuaaanujiniji Pueyaso rupaa tojjijia nia quiniucua, ¿taateni? Naa mariqui na niishitiojonuujuaca quiriquia tari. Saniniuuja, niaari quiarijia paniya socua nia niishitiojosaa-nuhua maatia niishishaatia casaa Pueyasojiniji. Naaari juhua naatujooriria quiriohuacuaa, juhua shipiyataaquishoojua. Naacuajitij, majaari nia naata jiyajeneta niishitiojosano casaa niishiniu.

¹³Naa maatia niishitiojosano niishijia nia quishacari saajatej, niaari juhua conaaja quiyajaa, saaja quitiaacaacua naataja. Majaari Jesucristo niishitiojosano tojtiajaca nia quiniu, maninia mijijia nia quiniuria. ¹⁴Juhua tariucua mashiquioriria nia jiyateriquiani. Mashiquiori cutaraari puetunu casaajanaa miquenuujuaca. Naajuhuj, puetunu Jesucristo niishitiojosanojuanaa niishijia nia quiriquia. Naa jaara na niishitiojosano tojjijia quiriquia, saaja maninia mijijia nia quiniuria, niaari maninia niishiniutianiya teyano casaate maniniani, teyano casaate sesa saniniunijia.

6 ¹Naacuajitij, majaari juhua naatujoori nia quiniu pueyaracaanu. Seetanujuanaa socua Pueyaso rupaa tojtiajaca nia quiriquia, juhua tariucua cumantumaca mashaja nia quiniuria, cumueeca. Niaacuajaari tari coteenujuanaa Jesucristojiniji niishitiojosano niishijia. ¿Niaatucua casaara socua niishitiojosaarohua nioojia nia tacatonurani, maja nia tiuuniuria maninia nia miishanoocua najuhuananij? Niaacuajaari tari niishiya, majaari nia naata maninia nia miishanota tama nia cuaqueyajaaja jiyanootiniyu Pueyaso. Cunora, niaari

Jesucristoocua tiuujiacara quiquiaari tari, Pueyaso jiyanooniuria niajaniya. ²Naajuhuj, niaacuaajaari tari niishitiojosaaquiaari moojinia nia tiuquinishaanura Pueyaso pueya nia quiniucua. Niaari niishitiojosaaquiaari-jihua Pueyaso pueyacua nia nianura nia juaashiquia nojoriucua nia secojosacari, Pueyaso cumaquiniuria nojori. Niaari niishiyajuhuj, macunucuaari samiitiacanutaniuhua. Nojorijinjinio saniniuujia, Pueyaso tojiyashijiacaari pueyaracaanu saniitosocoriquiano jiyatesaanutaniya. ³Quiarijiani, majaari socua cua niishitiojonu quiniutianiya niajaniya nio shusha cua sequesanojiniji niajaniyani. Pueyaso cumaquishacari janiya, janiyari socua jiyajeneta casaa Jesucristojiniji niishitiojonutaniya niajaniyani.

⁴⁻⁵Pueyano jaara Pueyaso Rupaa tojiyashijiara quiriohua, najuhuaanaari na niishitiojonu pacutenuhua, nojuaja jaara tari Pueyaso Sohuanu cuhuatasano jiuujiaraca quiquiaari. Najuhuaanaari nojuaja jaara tari jiyanooshano quiquiaari, nojuaja jaara tari Pueyaso Sohuanu cumaaca niishijia quiquiaari. Najuhuaanaariuhua nojuaja jaara tari Pueyaso Rupaa shuquiritajia quiquiaari, nojuaja jaara tari Pueyaso cumaacaraca quijia quiquiaarijihuj. ⁶Jiyano pueyanotej, majaari tari na naata sesa miijia na quiniucua taraajetesaanuhua, Jesucristoocua na tiuuniuhua seetanujuaana. Nojuajaari juhua Pueyaso Nyanu teetenu pacuteya niyacutesanojinia, naa na ruuretajaca na quiniucua. Naa Jesucristo tacartaja na quiniucuatej, tamasaacari Jesu rerequetequiaajuhuj. ⁷⁻⁸Naacuajitij, cuno pueyanoori juhua noo cuhuariquia tee cuniqui sesa jiyasocua maniniucuaa moritianucujani, riyocuacanio. Pueyasoori najuhua maru niyojotequiaa. Majaari cuno cuhuariquiajinia nataacuaca muetunu.

Jiyano cuhuariquiatej, na camaru cuaara catijataaranoj. Pueyasoori naa saniitio-nutaniya nocuaji ruparequeno pueyajuhuj. Saniniuujia, Jesucristo rupaa tojiijiacani, nojoriiri juhua maninia cuhuariquia. Pueyasoori maru niyojotequiaa nocua, maninia na muetutenura tii natoosano casaa. Naacuajitij, na camaruuri queraatia miajajauraca quiniutianiya. Naajuhuj, Pueyasoori na tojitianu tarinitiaashijiaca shuquiritiniutianiya pueyaracaanura.

Pa niishishacari Pueyasoori maninia pa miiniutianiya, paari cunora na tojinu tarinitiaaquiquiaani

⁹Miriqui cua pohuatasano sesa cuhuariquiajinijini, cunoori maja niajaniya cua panishano pueyanaa. Majaari cua taacanuunu niajaniyajiniji. Niaacuaajaari pa Jiyaniijia tojitiajaca quiquiaa. ¹⁰Pueyasocuaajaari jiyanoohua maninia. Nojuajaari maja na niyajetanu quiniutianiya maninia nia miishano niarta Pueyaso pueya, Pueyaso panijiaca nia quiniucua, taa quiarijia nia miyajaacua-jani. ¹¹Naatej, taa shitimia niarta Pueyaso pueya naacujuacatucua niajaniyani, naajuhuj, janiyari nia panitiaani pa Jiyaniijia nia sashiniuria nia timiniutiajuhuj, nojuaja jaara pa rijionuucua tiuquiriohuajaatijia. Nia niishitiriquiajaanuhua, Pueyasoori jiyanoohua maninia miiniutianiya pajaniya. ¹²Majaari nia macuhuaeconu juhua taajecori nia quiniuria pa Jiyaniijia. Saniya nia quiriquia cutara juhua tariucucuaanu parta Pueyaso pueya. Nojoriiri shamaatia Pueyasocua tiuujia quiquiaari pueyaracaanu. Naquiyi miiniu rejeretajacaari quiquiaarijihuj. Naaratej, Pueyasocuaajaari tari maninia miiquiaa nojori, taa seetanujua-naa na sequequiaari na pueyarano na miiniuriacuajani.

¹³Pueyasoori seetanujuanaa saaquiiano Abraham sequequiaari taa na miiniutianiya maninia nojuajani. Majaari na naata sequenu, tamonu cuaara na saniitiooranoj, nojuaja jaara miyaquiri na sequesano saaquiiano Abraham. ¿Cantucuaa cumaacaraca Pueyaso na saniitionurani? Shaaqui. Nojuajanaacuaajaari Jiyaniijijajanaa. ¹⁴Naaratej, Pueyasoori naa sequequiaari saaquiiano Abraham:

“Janiyari seetanujuanaa maninia miiniutianiya quiajaniyani. Janiয়ারি quia jiuha muetutenutaniya jiyanhua queraatiarani”.

¹⁵Naa Pueyaso sequenu nuhuaji saaquiiano Abrahamtej, Abrahamri juhuajaniya sashiquiaari Pueyaso cuaara na sequesano miiquiaarijiaatijia. ¹⁶Pueyanaa, niaacuaajaari niishiya taa pa miiquiaani, parta pueyano niishiniuria paari nojuaja pa sequesano miiniutianiya seetanujuanaani. Paari naa sequequiaani: “Seetanujuanaa quia sequeyanijia. Majaari cua sapojonu. Pueyaso cuaara saniitioora janiya, janiya jaara cua sequesano miyaquirini”. Naa pa sequesacaritij, parta pueyanoori juhuajaniya pocua tiuujia. Majaari tari na taacanuunu pocuaji. ¹⁷Naajuhua, Pueyaso sequesacari taa seetanujuanaa na miiniutianiya na pueyaranoni, nojuajaari jiyanhua panitiaquiaari pajaniya, na sequesanoocua pa tiuuniuria seetanujuanaa. Majaari na paniniu quiquiaari pa taacanuunura quenaaja na sequesanojiniji. Cunora, nojuajaari naa sequequiaari: “Janiyacuaajaari Pueyasoni. Majaari cua niishiniu sapojonu. Cua sequesanoori seetanujuanaa”. ¹⁸Naacujitij, Pueyasoori maatia sequequiaari taa na miiniutianiya nocua tiuujiacarano pueyarani. Majaari saaja cuno na sequenu quiquiaari. Nojuajaari sequequiaarijuhuaj: “Cua sequesanoori seetanujuanaa”. Pueyaso sequesanoori maja na naata jatanishaanu. Naacujitij,

pajaniya, nocua tiuujiaa pueyani, paari poojia cajitiquiaani maatia pa niishishacari, pocuaji Tacunaari puetunu na sequesanojuanaa miiniutianiya pajaniyara. Naacujitij, majaari pa taacanuunu quenaaja. ¹⁹Naa Pueyaso sequesanoocua tiuujiaa pa quishacaritij, paari juhuajaniya naquiya miiniu rejeretajaca quiquiaani. Sesaacaari maja na naata Pueyaso jaariutianu pajaniya. Naacujitij, paari juhua buqueni, pootioyaquishoo, niiquia casaacuaji na jaasutanuucua. Cuno niiquia casaari niquishoo, moo cariquimia pojiyari. Naajuhua, nocua pa tiuushanoni, nojuajaari jiyocuacaanu quiya, niquishoojaariuhua na Que Pueyaso shuriucua na quiniucua. ²⁰Nojuajaari na Queecua quianu pa puetaquiaari. Nojuajaari tii pueyaracaanu secojoquiaa na Que pocuara, na Que jiyanooniuria pajaniya. Naacujitij, Pueyasoori na jiyatequiaari pueyaracaanu secojona na quiniuria pueyacuara, taa Melquisedec quiquiaaricuaani.

Jesuuri pueyacuara secojona, taa Melquisedec quiquiaaricuaani

7 ¹Cuno Melquisedecni, nojuajaari Salem tiaca jiyaniijia quijia. Nojuajaari Pueyasojanaa secojona pueyacuara. Pa supuetana Abraham tacetasacariuhua na naminu nuhuaji na paraa, tamasa tiacajinijinio jiyaniijianucua, Melquisedecri nocua tohuataquiaari Salem tiacajiniji. Naa na sequequiaari: “Abrahamnaa, quiaari Pueyaso timitiasano. Pueyasoori quia miiniutianiya jiyanhua maninia”. ²Jiyacaritij, Abrahamri na paraa casaminiariquihua na quiquiojiniohuara. Naacujitij, nojuajaari puetunu cuno casaminiijiniojuanaa Pueyasora na riuriosano niquitioquiaari Melquisedec. Abrahamri naa miiquiaari na niishishacari Melquisedecri Pueyaso secojona

pueyacuara quiquiaari. Pueyanaa, nio Melquisedecjiniji nia niishiri. Pueyano rupaajinia, na sesaari sequeya, “Saaja maninia miijia jiyaniijia”. Naajuhua, na tiaca sesa Salemni, cunoori pueyano rupaajinia sequeya, “Juhua janiya quijia pueya tiaca”. Na sesaari naa quiquiaari na pueya jiuujia cajitijia na quiniuucua. ³Majaari tojetaarucujanaa na niishishaa-nu, ¿queraca quiquiaaritii, nucaracajuhua, supuetanaaracanio? Majaari quenaaja na pohuatasaanujuhua na rasaanujiniji, na shaajenujinijinio. Naacujitij, pajaniyara, Melquisedecri juhua pueyaracaanu quijiajuhuanajaj. Majaari na niishishaanujuhua, tamonute na niti jiyatesaaquiaari pueyacuara secojona na quiniuria. Maja. Naacujitij, nojuajaari juhua Pueyaso Niyanu, pueyacuara secojona na quiniuria pueyaracaanura.

⁴Pueyanaa nia niishiri, Melquisedec-quiiri seetanujanaa tojishano pueyano quiquiaari socua pa supuetana Abraham-jiniji. Naaratej, pa supuetana Abrahamri nareja na niquitioquiaari na paraa na shocotasano casamijinijinio. Secaja niquitioquiaariiri taa Pueyaso rootaquiaari pa supuetanaacujani, nojori niquitiojonura nera. Tariucuaaanu, Pueyasoori pa supuetanaa niishitiojo-quiaari nojori niquitiojonura secaja, puetunu nojori jittiasano casaajinijia-naa. Naacujitij, pueyano jaara diez casaa jiitiare, cuara Pueyasora niquitioo-ra niquiriyatujua. ⁵Pueyasocujaari supuetana Leví* niquiohuacuajinio supueno pueya jiyatequiaari narta Israel pueyacuara secojonaa nojori quiniuria. Nojoriiri jiyatesaaquiaari Pueyasorano pueya niquitiojosano masejoja nojori quiniuriajuhua. Naa Pueyaso sequesano-cujaari Moisés Rootasanojinia naajiotasaaquiaari. Abrahamcuajaari puetunu Israel niquiohuajanaa supuetana

quiquiaari, maja saaja Leví supuetana. Naajaa, Leví niquiohuacuajinio supueno pueyari Pueyasora narta Israel pueya niquitiojosano masejoja. ⁶Melquisedecri pueyacuara secojona quiquiaarijuhua. Maja cutaraari Leví niquiohuacuajinio na supueno quiquiaari. Naajaa, seetanujua-naa pueyacuara secojona na quiniuucua, Abrahamri Pueyasorano na riuriotaca na niquitioquiaari. Abrahamri seetanujanaa Pueyaso timitiasano pueyano quiquiaari. Naaratej, Pueyasojanaacujaari tari Abraham sequequiaari, nojuajaari maninia na miiniutianiya. Naajuhua, Melquisedecri pa supuetana Abraham sequequiaari Pueyasoori jiyanojua maninia miiniutianiya nojuaja. ⁷Paacua-jaari niishiyani, Pueyaso jaara maninia miiniutianiya tamonu pueyano, na sequesano caminiujunia pueyanoori socua tojishano pueyano maninia na miishocoriquiano pueyanojiniji. Naacua-jitij, paari niishiyani Melquisedecri socua tojishano pueyano quiquiaari Abraham-jiniji. ⁸Quiarijiani, Pueyasorano pueya niquitiojosano masejojuacani, puetunu nojorijianaari shaajejaca pueya. Saniniuujia, tariucuaaanu Pueyaso Rupaajinia pa serojosacari Melquisedec-jiniji, juhua saminiujiniji pohuataashiyari. ⁹⁻¹⁰Nia niishirijuhua, Leví niquiohuacuajinio pueyacuajaari Pueyasorano pueya niquitiojosano masejojuaca, pueyacuara secojonaa nojori quiniuucua. Cua tojiri pueyanaa, Melquisedec naacuneetoosacari Abrahamta, Abrahamri jiyacari tari na cuaqueyajinia jiitariquiaa puetunu nocuajinio supueriquiano pueyajanaa. Naacujitij, Abraham niquitiosacari Pueyasorano na riuriotaca Melquisedec, pa naata sequenu Leví quiriqianojuanaa-ri jiyacari Melquisedec niquitioquiaari, Abraham quiniuucua na jiyasorano tari.

¹¹Leviacuajinio supueno pueyari pueyacuara secojonaa quiquiaari, nojori

miiniuria taa Moisés Rootasanojinia sequequiaaricujani. Naacujitij, narta Israel pueya jaara sesa miiquiaari, nojoriiri sesa miijiaca seya puecooquiaari pueyaracaanu tama na camarahuacuara-jaaja, nojori na jiyanoootiniuria Pueyaso. Naa nojori miishano jaara pueya jiyateriquia tojetaarucujanaa sesa miyashijiacara, paa maara tamonu pocuara secojoriquiano paniyaquiriquiani. iTamonu pocuara secojoriquiano cutaraari panishaaquiaari! Juhua pueyaracaanu rishijia Melquisedec panishaaquiaari cutaraari, maja juhua Aarón* saniniujia, nocuajinio supueno pueyano. Nojoriiri shaajecata cutara.¹²Aaróncajaari narta pueyacuara secojonaa jiyaniijia jiyatesano quiquiaari, taa Moisés Rootasanojinia sequeyacuajani. Naacujitij, tamonu pueyano jaara jiyatesaarecuaa pueyacuara secojona na quiniuria, tamonu rootasanoori panishiyajuhua, Moisés Rootasano niti na quiniuria.¹³Tariucacaanu Pueyaso Rupaajinia, maatia sequeyacuajaari, Pueyasoori tamonu pueyano jiyatenutaniya pocuara secojori-quiano. Nojuacuajaari pa Jiyaniijia Jesu. Nojuajaari maja Leví niquiohuacuajinio supueno. Nojuajaari supuetana Israel niyanuucujiniocujaja, saniniujia tamonu neyanuucujiniojaarohuaj, teyanooacuajinio quenaaja niquiriyatu pueyacuara secojona supueyaquiquiaari-cujani.¹⁴Maatia niishishiyacuajaari, pa Jiyaniijiaari Judá* niquiohuacuajinio supueno quiquiaari. Judaari Leví tarajanucujaja. Moisés pohuatasacari pueyacuara secojonaajiniijini, majaari quenaaja Judá na jiyaniquini quiquiaari.

¹⁵Quiarijiani, quiarinio pocuara Secojona quishacari juhua Melquisedec, paari maatia niishiyani Leví niquiohuacuajinio supueno pueyacuara secojonaari sanitishaaquiaari.¹⁶Nojoriiri pueyacuara

secojonaa quiquiaari saaja Leví niquiohuacuajinio supueno pueya nojori quiniuucua. Jesucristo cutaraari pocuara secojonara jiyatesaaquiaari pueyaracaanu rishijia na quiniuucua.¹⁷Cunora, Pueyasoori naa sequequiaari nojuajiniji:

“Quiaari pueyacuara secojona quiniutianiya pueyaracaanura, juhua Melquisedec”.

¹⁸Naacujitij, puetunu Moisés rootasanojuanaa pueyacuara secojonaa pueya miishocoriquianoori tari jatasaquiaari, najuhua na quiniuucua. Cuno miishanoori cumaacaju quiquiaari pueya na jataniniuria.¹⁹Seetanujuanaari, Moisés Rootasanoori maja na naata quiquiaari saaja maninia miijiacara na jataniniuria na tojitiajaca. Quiarijia saniniujia, paari Pueyaso rupaa Jesucristojiniji jiitiaani. Nocua pa tiuushacari, Jesucristoori pueyaracaanu pa jiyanoootiquiaa na Que, juhujaniya pa rupuenura nojuaja.

²⁰Na Que sequesacari Neyanu quiniuria pocuara secojona pueyaracaanura, nojuajaari naa sequequiaari seetanujua-naa. Naacujitij, paari panaatia quiquiaani pa niishishacari Jesucristoori na Que shuriucua quiya, pueyaracaanu pocuara na secojonura na Que. Saniniujia, majaari naa Pueyaso sequenu quiquiaari Leví niquiohuacuajinio supueno pueya, seetanujuaanaa pueyaracaanu pueyacuara secojonaa nojori quiniuria.²¹Saniniujia, Neyanujiniji na sequesano, cunoori seetanujuanaa. Majaari na sequesano jatanishaanu quiniutianiya. Naacujitij, naa naajiotasano quiyari tariucuaaanu Pueyaso Rupaajinia:

“Jiyaniijia Pueyasoori seetanujuanaa sequere na miishocoriquiano. Majaari na sequesano na jatanini quiniutianiya. Neyanu sequerecuaajaari: ‘Quiaari pueyacuara secojoriquiano pueyaracaanu’”.

²²Naacuaajitij, pueyaracaanu na Que shuriucua Jesu quiniuucua pocuara na secojonura, paari seetanujuanaa niishiya-ni paari Pueyaso pueyani, Neyanuucua pa tiuuniuucua. Naacuaajitij, Pueyaso rupaa Jesujiniijiri socua jiyano-hua maninia Moisés Rootasanojiniji. Cunoori pueyaracaanu rishijia Jesu quiniuucua. ²³Saniniuujia, Leví niquiohuacuajinio supuenoni, queraatia pueyacuara secojonaari quiquiaari pueyaracaanu rishiyashijia nojori quiniuucua. ²⁴Jesu cutaraari shaajeyashijia. Naa pocuara secojona na quishacaritij, majaari quenaaja tamonu sanitiniu quiniutianiya nojuaja. ²⁵Naacuaajitij, nocua pa tiuusha-cari, nojuajaari pueyaracaanu pocuara secojoquiaa, tojetaarucujanaa maninia mijiacara pa jatanishaanura, Pueyaso pa rupuenura. Majaari pocuara na Que na secojonu na tarinitianu quiniutianiya, shaajeyashijia na quiniuucua.

²⁶Jesuuri namitia pocuara secojona na Que. Majaari tamonu quiniu juhua nojuaja. Nojuajaari tojetaarucujanaa maninia mijiājuhuanajaj, juhua na Que Pueyaso. Majaari quenaaja sesa miiniu na niishiniu. Sesa mijiaca tajinia na quishacari mijiria, naajaa, majaari sesa na miiniu quiquiaari quenaaja. Saaja maninia mijiaca na quiniuucua, nojuajaari tojetaarucujanaa tamaatia quijia mijiria quiniaa pueyajiniji. Naaratej, Pueyasoori jiyocuacaanu quijia na jiyatequiaari, Jiyaniijajanaa na quiniuria na shuriucua, tii na secojonura na Que pocuara. ²⁷Leví niquiohuacuajinio supueno pueyacuara secojona jiyaniijianucuaari pueyaracaanu tama sesa nojori miishanoocuarajaaja seya puecootujua coteenu, Pueyaso jiyanooniuria nojori. Naa nojori miiniu nuhujitij, nojoriiri jiyacari narta Israel pueya seya puecoquiaari sesa cuno pojori miishanoocua saniniuujia. Maja cutaraari naa Jesu miiniu quiquiaari.

Nojuaja jaara tama na cuaqueyajaaja tarinitiaquiaari pocuara na mosaanura juhua borregoniyojua sesa pa miishanoocua, cunojuanaari na cusonu quiquiaari. Majaari socua na caminiu quiniutianihua cusonu. Naa na cusonuu-cua pocuaratej, puetunu sesa mijiicajanaari na naata jiyanooshaanu puetunu sesa na miishanojinijijianaa. ²⁸Moisés Rootasanojinia, Pueyasoori tii sequeyacuaja canapue te pueyacuara secojona jiyaniijia jiyateshiyani. Puetunu cuno pueyacuara secojona jiyaniijianucujanaari sesa mijiaca quiquiaari, juhua puetunu pueyājuhuj. Jiyano-hua Moisés nuhujaj, Pueyasoori saniniuujia tama Neyanujaja jiyatequiaari pocuara secojonajanaa na quiniuria pueyaracaanu. Na Que tojjia na quiniuucua pueyaracaanu, naquiya miiniu rejeretaja na quiniuucujuhuj, naacuaajitij, nojuajaari tojetaarucujanaa maninia, pocuara secojonara na jiyatesa-nura.

**Quiarinio Pueyaso Rupaacua pa
tiuushacari, Jesuuri pa
jyanootiquiaa na Que**

8 ¹Nio, janiya na pacutenutaniuhua sequenuni, cunoori socua panishano nia niishiniuria. Cua tojiri. Pueyaso Niyanu quiniuucua pocuara secojona, nojuajaari na Que miaquetajara cajiquiaari jiyocuacaanu. ²Nojuajaari tii na Que secojoquiaa pocuara Pueyaso Quishaquijianaa. Cunoori Pueyasojuanaa shipinishano quiquio, maja pueyano tiasano.

³Puetunu pueyacuara secojonaajanaari jiyatesaquiaari nojori masejonura narta pueya poosano casaa, Pueyasora nojori niquitiojosano. Naājuhuj, nojoriiri seya puecojuaca, Pueyaso nojori jyanooti-niuria. Naacuaajitij, Jesucristo quiniuucua pueyacuara secojonājuhuj, nojuaja

cuaara casaa jiitiaara, Pueyaso na niquitiosocoriquianojuhuaj. Cuno casaacuaajaari tama na cuaqueyajaaja quiquiaari, pocuara na mosaanura, Pueyaso jiyanooniuria pajaniya. ⁴Leví niquiohuacuajinio supueno pueyacuara secojonaacuajaari pueya nitiasano nojoriicua masejoquiaajaa, Pueyasora nojori niquitiosocoriquiano taa Moisés Rootasanojinia sequeyacuajani. Naacuajitij, Jesucristo jaara mijiria quiriquiaja, nojuaja maara pueyacuara secojona quiaquiriquiaj. Pueyacuara secojonaacuajaari queraatia quiya. ⁵Pueyacuara secojona jeecajosano casaa Pueyaso Secojojua tiajinia nojori jiitiasanoni, nojori miishanonio, puetunu cunojuanaari saaja juhua jiyocuacaanu casaa naaqui. Cunora, Moisés jaara tari shipiniriquiaa Pueyaso Secojojuara suhuorotu, puetunu na casamitijanaanio, jiyacaritij, Pueyasoori naa Moisés sequenu pacutequiaari:

“Moisésnaa, cua tojiri. Maninia quia miiri jacaria puetunujuanaa, naatej, taa cua niquitiquianucuaa quiajaniani, Sinaí tuhananuucua quia quishacari”.

⁶Pocuara Secojonajanaa miishanoori jiyanhua maninia socua pueyacuara secojonaa Leví niquiohuacuajinio supueno miijosanojiniji. Pocuara Secojona cutaraari tama na cusonutajaaja pa jiyanootiquiaari Pueyaso. Naacuajitij, Pueyaso rupaa Jesucristojinijiiri jiyanhua socua maninia Moisés Rootasanojiniji.

⁷Pueya jiuujia jaara na naata quiriquia seetanujanaa sesa miyashijiacara jatanishano Moisés Rootasano tojjiaa nojori quiniucua, Pueyaso maara quiarinio rupaa niishitiyaquiquiaari pajaniya. ⁸Saniniuujia, Pueyasoori niishiquiaari Israel pueyari maja na naata quiquiaari puetunu Moisés Rootasanojua-

naa tojinuu. Cunora, tariucuacaanu pueyara Pueyaso sequesano caminiujia sequesanoori naa naajiotasano quiya:

“Jiyaniijia Pueyasoori sequeya:

“Tamacari, janiyari quiarinio rupaa niishitiniutianiya Israel jiyajinijinio pueyani, Judá jiyajinijinio pueyano. Teyano pojoriti nocua tiuyani, nojoriiri seetanujanaa cua pueya quiniutianiya. ⁹Quiarinio cua rupaari tamaatia quiniutianiya Moisés cua niishitijosano rupaajiniji puetunu Israel pueyarajanaa. Jiyacaritij, janiyari nojori mashi-quiquiaari Egipto jiyajinijini.

Juhua nojori que, janiyari nojori jaatucunuuriquiaa juucuan nojori cua niquitiosocoriquiano jiyajiniera. Saniniuujia, nojoriiri Moisés cua rootasano nojoriria tojinuu paniyaquiquiaari saaja. Janiyari cunora nojori cartequiaarini’.

Jiyaniijia Pueyasoori naa sequeeree.

¹⁰Socua sequeyari: ‘Nio pa quishacari nuhuaji, janiyari naa miiniutianiya cua saquiriojosano pueyarani: janiyari coojia nianutaniya nojori jiuujiajiniani.

Naacuajitij, cua rootasanoori juhua naajiotasano quiniutianiya nojori niishitiajajinia, seetanujanaa cua tojitiajaca nojori quiniuria.

Naacuajitij, janiyari nojori Jiyaniijajanaa quiniutianiyan. Nojoriiri saniniuujia cua pueya quiniutianiyacujua. ¹¹Jiyacaritij, pueyano jaara janiyajiniji pohuatano paniri narta pueyano, na cojiniajuhuaj, tapueyocucanio, cunoori najuhua-na quiniutianiya. Puetunu pueyapuejanaacuajaari tariucua cua niishijiaa quiniutianiya; jiyaniijianucua, poonijotesano pueyano. ¹²Janiyari nojoriicua taraajeja quiniutianiyan. Majaari

cua saniitionu quiniutianiya nojori, sesa nojori miishanojiniji. Naa cua jiyanooshacari nojoritij, majaari socua cua saneejonu quiniutianiya sesa nojori miishano. Janiyari puetunujuanaa na niyajetanutani-yani’”.

¹³Naa Pueyaso sequesacaritij, taa nojuaja quiarinio na rupaa niishitiniutianiya pajaniyani, nojuajaari tariucuacaanu Moisés na rootasano jiyatequiaari tariucaneera. Naacujitij, Moisés Rootasanoori quera shaajasaanutaniya puetunujuanaa.

**Tariucuacaanu Moisés suhuorotesano
Pueyaso quiquioranoni, cunoori juhua
jiyocuaacaanu Pueyaso quiquiojuhuaj**

9 ¹Tariucuacaanu, Pueyasoori Moisés sequequiaari mijiria na quiquiorano na suhuorotenura. Na niishitiojoquiaari-jiariuhua taa pueyacuara secojonaa poonijionutaniya cuno na quiquiojiniani. ²Pueyaso Secojoua suhuorotuuri caapiqui sohuacaraca quiquiaari. Samari nujuatacojuaari coteenu sohuacajinia quiquiaari, miaquejania, tee Pueyaso tacoji pan niojosaaquiaari pueyaracaanu-cujani. Cuno sohuaca sesa quiquiaari “Pueyaso Shuriucua Quiquio”. ³Cuno coteenu sohuaca puequeetujiniani, tii tunusano quiquiaariiri shiquiaruque toque. Cuno toque tamajiria quiquiaariiri Pueyaso quiquiojuanaa cutara. Naaratej, na sesa quiquiaari “Pueyaso Quishaquijianaa”. ⁴Pueyaso Quishaqui tacoji nujuatajaari juhuacutu, orojiniji shipinishano. Cuniqúi catejaari shanohua jaanutaja Pueyasora. Pueyaso Quishaquijianaa cutarani, tii nujuatajaari puereetuca casaa, juhua caaja niquishano. Naananeecajiniji shipinishaaquiaariiri. Puetunu na cuaqueyajanaari orota mishiquiosano quiquiaari. Na jiniacuma, casamiiri mii racatasano

quiquiaari. Pataconiyojua orojiniji shipinishanoori tii cajitiaquiaari “maná*”. Manaari quiquiaari Pueyaso tinishano casaa, Israel pueya miaquesocoriquiano cariiquia jiyajinia nojori camarucuneejotasacari. Mii matariquiaajaariuhua Aarón natata catuutianohua, puetunu na jajautajanaa. Mii maturiquiaajaariuhua sai neeca quejasano, nocua Pueyaso naajiotasano na rootasano, Moisés na niquitiojosano. ⁵Cuno caaja tiotiu caco nujuatejosano quiquiaariiri caapiqui shipinishano casaa, nesuhuaraca, juhua Pueyaso seya niquishano. Nojori nesuhuari coqueetesano quiquiaari. Teecojuaari, teje Pueyaso shacantuuca mueranacujuquiaari Moisésacuajani. Cuno caaja tiotiuuri seya nanaca majiriutiasaquijiuhuaj, Pueyaso jiyanooniuria puetunu Israel pueyajanaa. Tariucuaja puetunu cuno casaajiniijianaa cua pohuatasano nijaniya.

⁶Pueyaso Secojoua tia jaara tari naa maninia tiasano quiquiaari puetunu na casamitijanaa, na nuhuaji, pueyacuara secojonaari pueyaracaanu tiuquijioquiaari Pueyaso Shuriucua quiquiojinia. Nojoriiri tii tiuquijioquiaari nojori miiniuria taa Moisés Rootasanojinia sequeyacuajani. Maja cutaraari nojori tiuquitianu quiquiaari Pueyaso Quishaquijianaa sohuacamara. ⁷Saaja nojori jiyaniijia cutaraari tii tiuquiquiaari saaja rupaquijia puetunu marijijarajanaa. Na tiuquishacari Pueyaso Quishaqui, seya nanaca pataquiaariiri Pueyaso jiyanooniuria nojuaja, narta Israel pueyanio, sesa nojori miishanojiniji. ⁸Naa Pueyaso Quishaqui quiniuucua mishiquionucua pueyacuajitij, Pueyaso Sohuanuuri pa niishitiya, pueyari juhuanoujaaja maja na naata rupeenu quiquiaari Pueyaso. ⁹Naacujitij, puetunu cunojuanaari quiquiaari juhua miriqui miishano, saniniuujia nio pa quishacari pa

niishiniuria pocuara Secojonajanaa miishano pocuara. Puetunu pueyacuara secojona catijiasano casaajanaari miriqui miishano quiquiaari saaja. Naajuhuaaj, pa supuetanaa niqutijosano casaa Pueyaso jiyanooniuria nojorini, puetunu naa miishanojuanaari miriqui miishano quiquiaari. Naacujitij, cunoori maja na naata cuno pueya jiuujia jeecanu seetanujanaa, juhuajaniya nojori rupuenura Pueyaso. ¹⁰Naaratej, cuno tariucuacaanu rootasanoori saaja panishaaquiaari Pueyaso cuaara na sanitiquiaariijaatijia quiarinio rupaata. Cuno tariucuacaanu rootasanoori pueya niishitiquiaari teyano sumatuuteja miaqueshiyani, teyano mashacateja ratushiyani. Naajuhuaaj, nojoriiri niishitishaaquiaari taacari pueya jeequeya na cuaqueyani, nojori casaanio, juhua maninia jeequejosano nojori quiniuria Pueyaso niquiara. Puetunu naa pueya miishanojuanaari maja na naata pueya jiuujia jeecanu sesa nojori miishanojiniji.

¹¹Quiari naataja saniniuuja, Jesucristoori pocuara Secojonajanaara jiyatesaaquiaari, Pueyasojiniji na masenura Pueyaso jittiasano pajaniyara-no. Cuno quiquio, tee na secojoquiaa na Que pocuacujajani, cunoori seetanujanaa Pueyaso quiquio jiyocuacaanu, maja pueyano tiasano. ¹²Naa Cristo tiuquishacari na Que quiquiojinia Pueyaso na jiyanoootiniuria pajaniyatej, nojuajaari maja na tiuquitianu quiquiaari cabra nanaca, juunu niquiohua nanacanio. Nojuaja cutaraari tama na nanacatajaaja Pueyaso jiyanoootiquiaari pajaniya. Nojuajaari maja pueyaracaanu na tiuquijionu na Queecua, taa mijiria pueyacuara secojona jiyaniijianucua miiquiaaricuaani. Maja. Nojuajaari na Queecua tiuquiquiaari puetunujanaa. Naa pocuara na cusonuucatej, na Queeri

Neyanuucua tiuujiaa jiyanooquiaa puetunujanaa. Naacujitij, majaari Pueyaso shuriucuaji pa taanuusaanu quiniutianiya. ¹³Pueyasoori Moisés niishitiquiaari, pueyano jaara macu masaqui tiuquimia, jaara na quiarejuhuaj, jiyacaritij, nojuajaari juhua curutuucua Pueyasora. Naacujitij, cuno pueyanoori maja na naata narta pueya rupuenu. Majaari na naata Pueyaso Secojojua tiajinia tiuquiniujiuhuaaj. Naajaa, nojuajaari na naata jeequesano quiniuhua, seru nanaca jaara nocua majiriutiasaaquiaari. Cabra nanaca, juunu nanaca, niyacoo juunu catijiasano juacani, puetunu cunojuanaari maninia quiquiaari pueyara, juhua jeequesano nojori quiniuhuaa Pueyasora. ¹⁴Naa pueya cuaqueya quiniuucua juhua jeequesano saaja seya nanacatacuatej, Cristo nanaca cutaraari seetanujanaa cumaacaraca pueya jiuujia na jeequenura seetanujanaa, puetunu sesa casaajiniijianaa. Naatej, taa pueyacuara secojona jiyaniijianucua tiuquitiaquiaari seru nanaca Pueyaso Quishaquicuaani, pueya jiyanooshaanura, Jesucristoori naa miiquiaarijiuhuaaj. Pueyaracaanu quijia na quiniuucua, Jesucristojanaari tama na nanacajaaja tiuquitiaquiaari Pueyasoo-cua, pa jiyanooshaanura puetunu sesa pa miishanojinijijianaa. Nojuajaari tojetaarucujajanaa sesa miyashijia quiquiaari. Naacujitij, na nanacaari poojia cajitiquiaa, nocua pa tiuushacari. Majaari socua pa jiyaniniu pa naata tama pa cuaqueyajaaja jiyanoootiniu Pueyaso tama pa miishanotajaaja. Naacujitij, quiarijia cutaraari pa naata pa Pueyasora poonijionu shitimia, seetanujanaa jiyanooshano pa quishacari.

¹⁵Jesucristo cusonuucua pocuara, nocua pa tiuushacari, nojuajaari pa jiyanoootiniara quiquiaari taa quiarinio Pueyaso rupaa sequeyacuajani.

Naajuhuj, noo pojori, Pueyasooocua tiuujiaa mijiria Jesu niyacarijiani, sesa nojori miishanoori jiyanooshaaquiiaari Jesu cusonuta quiari naatajajuhuj. Naacujitij, puetunu Pueyaso saquiriojosano pueyapuejanaan na naata puetunu Pueyaso niqutiojonu panishanojuanaa masenu, taa na sequequiaari niqutionu seetanujuaacujani, pueyaracaanu shuquiriaatia jatiqui pa quiniuria nata. ¹⁶Pueyanaa, pa shaajeyaquishacarijia, paari pa miiniu panishano naajiotanu niishijiani. Paari naa mijiani pa casami serotasaanura maninia, teyano pueya pa panitiaa nojori jiitianura pa casamicuajani pa shaajenu nuhuaji. Naacujitij, paa jaara tari jamosaareni, pueyari maninia miiquiaa taa pa naajiotajuaaricujani, saminio pa quishacarijia. ¹⁷Naacujitij, saminio pa quishacarijia, najuhunaanari pa naajiotasano. Pa shaajesacari, jiyacari cutara pa casamiiri niqutiojosano. ¹⁸Tariucuaaanu naajuhuj, seya nanacaari shootesaaquiiaari, Israel pueya niishiniuria Moisés Rootasanoori seetanujuaanaa, nojori tojishocoriquiano. ¹⁹Naa quiquiaariiri: Moisésri puetunu Pueyaso rootasanojuanaa nojuaja caminiujiquiaari puetunu Israel pueya niquiarajanaa. Na nuhuaji, Moisésri juunu niquiohua nanaca, cabra nanaca cojitiquiaari mohuacata. Cunojinia shitiaquiaari borrego cajaca naatusu hisopo* cashacucuaataari. Cunota, mohuacanacu majiriutiaquiaari Pueyaso Rupaa na naajiotasanoocuaari, puetunu Israel pueyacuajanaanio. ²⁰Jiyacaritij, nojori sequequiaariiri: “Nio nanacaari pa niishitiya Pueyasoori seetanujuaanaa pajaniyara miiniutianiya puetunu na sequesanojuanaa, paa jaara na rootasano tojijiaa quirini”. ²¹Moisésri Pueyaso Secojojua tiaacua majiriutiaquiaari nanacajuhuj, puetunu Pueyasora poonijiotajara shipinijosano casamiicua-

janaanio. ²²Moisés Rootasanojiniji niishishiyacuajaari, quera puetunu casaajanaan saaja nanacata juhua jeequesano quiya Pueyasora. Pueya miishano sesani, cuno cutaraari maja na naata jiyanooshaanu nanaca jaara shooteyaquishaare.

Sesa pa miiniuuri jiyanooshaaquiiaa Cristo cusunucua pocuara

²³Mijiria Pueyaso Secojojua tia, puetunu na casaatajanaa quiniucua juhua jiyocuacaanu casaa naaqui, seya nanacaari maninia quiquiaaricuaa cuno mijiria casami quiniuria jeequesano. Saniniujia, jiyocuacaanu casaa quiniuria jeequesano, socua maninia nanacaari panishaaquiiaari seya nanacajiniji. ²⁴Majaari Cristo tiuquitianu quiquiaari seya nanaca mijiria pueyano tiasano Pueyaso Quishaquijianaa. Cuno quiquioori saaja juhua jiyocuacaanu Pueyaso quiquio naaqui. Cristo cutaraari seetanujuaanaa Pueyaso Quishaquijianaa tiuquiquiaari. Nojuajaari tti na Que Pueyaso secojoquiaa pocuara. ²⁵Mijiria pueyacuara secojonaa jiyaniijianucuaari puetunu marijarajanaa pueyaracaanu tiuquijioquiaari Pueyaso Quishaqui saaja seya nanacata, pueya na jiyanoootiniuria Pueyaso. Jesucristo cutaraari maja naa na miiniu quiquiaari. ²⁶Jesu jaara Pueyaso pa jiyanoootiriquia puetunu marijarajanaa taa pueyacuara secojonaa jiyaniijianucua miiquiaaricuaani, nojuaja maara jiya shipinishaanujiniji mosaariquia puetunu marijarajanaa. Quiari naataja saniniujia, Jesucristoori mijiria rasaanquiaari tama na cuaqueyajaaja na tarinitianura pocuara na mosaanura, pueya jiyanooshaanura puetunu sesa nojori miishanojinijianaa. Majaari socua na pacutesaanu quiniutianihua monu. Naa na mosaanuucuatej, cunoori tariucuaa puetunu nocua tiuujiaa

pueyajanaa jiyanooshaanura. ²⁷Naatej, taatucuaa pueyani, nojoriiri shaajecori-quiano. Majaari nojori samiitiaconuhua mijiria nojori quiniuhua, socua na cusonuhua juhua coteenu na csonu. Nojori shaajenu nuhuaji, nojoriiri saaja sashiya Pueyaso nequesoreenura nojori. ²⁸Naajuhuj, naa Jesucristo mosaanuucua jiyacaritij, saaja cunojuanaari na mosaanu quiquiaari, queraatia pueya jiyanooshaanura sesa nojori miishanojiniji. Naacuajitij, pocua na muetasacariuhua, majaari jiyacari socua na mosaanu quiniutianihua pueya jiyanooshaanura sesa nojori miishanojiniji. Jiyacaritij, nojuajaari saaja nocua tiuuijaca rijionuucua tiuquiniutianihua, noo pojoriria canapute na sashiyacuajani.

10 ¹Moisés Rootasano pueya miishocoriquianoni, pueyacuara secojonaa miishocoriquianojuhuaj, puetunu cunojuanaari juhua seetanujuanaa Pueyaso jiyocuacaanu casaa naaqui, Pueyaso racatasano Jesucristoocua tiuuijaca pueyarano. Moisés Rootasano tojtijajaca pueya cutaraari puetunu marijarajanaa na seya puecootequiaari, Pueyaso jiyanooniuria nojori juucua. Naajaa, majaari na naata seetanujuanaa maninia miijiaca pueyara na jatanishaanu seya nanacata. ²Naajuhuj, pueya miishacari puetunu Moisés Rootasanojuanaa, naajaa, nojoriiri maja seetanujuanaa tama nojori jiuuijajaaja na cajitiniu quiquiaari. Cunora, majaari nojori tarinitianu quiquiaari nojori seya puecootenu tama sesa nojori miishanoocarajaaja. Seya nanacaari maja na naata tuujunu quiquiaari sesa nojori miishano, seetanujuanaa juhuajaniya nojori quiniuria. ³Naa seya puecoosacari puetunu marijarajanaa Pueyaso jiyanooniuria pueyatej, cunoori saaja nojori niishitiquiaariuhua tarijia

nojori miishano sesa. ⁴Paari seetanujuanaa niishiyacuajani, juunu nanaca, cabra nanacanio, cunoori maja sesa pa miishano tuujujua seetanujuanaa.

⁵Cunora, tariucuacaanu Pueyaso Rupaajinia, mijiria Jesucristo niishacari na sequesocoriquianoori juhuacarijia naajiotasano quiquiaari. Naa sequeyari: “Cua Pueyasonaa, janiyacuaajaari niishiyani, majaari quioojia quia cajitiniu quiquiaa seya puecoosacari quiocuara, puetunu nataacuacajiniji pueya niquitiojosacari quiarajuhuj. Saniniujia, quiaari cuaqueyaraca cua quiniuria cua jiyateree, quiocuara cua mosaanura. ⁶Majaari quia timiniu quiquiaa seya catijiasacari quiocuara, naajuhuj pueya shootesacari na seya nanaca, quia jiyanooniuria nojori sesa nojori miishanojiniji. ⁷Naaratej, janiyari quia sequeyani: “Niya quiyacuajanija cua miiniuria quia panishano cua Que Pueyasonaa, taa janiyajiniji tariucuacaanu naajiotasaaquiaaricuajani”.”

⁸Moisés Rootasanojiniji pueyari maatia niishitiojosaquiaari nojori puecootenura tama na seyajaaja Pueyasooocuara, na nataacuacajinijinio nojori niquitiojonura nerajuhuj. Nojoriiri niishitiojosaquiaarijihuj nojori catijanura na seya Pueyasooocuara, tama nojori seya nanacajaaja shootesaanurajuhuj, sesa nojori miiniucua. Naajaa, Jesucristo sequesanojiniji, paari quiarijia niishiyani, puetunu naa pueya miishanojuanaari maja na timitiniu quiquiaari Pueyaso. ⁹Nocuaji, Jesucristoori naa sequequiaari na Que: “Niya quiyacuajanija, cua miiniuria quia panishano”. Naacuajitij, Jesucristojuanaari mijiria niquiaari pocuara na mosaanura, seetanujuanaa jiyanooshano pa quiniuria cutara, maja

najuhuaana seya puecoosaanura socua.
¹⁰Pueyaso tojjia na quiniucua, Jesucristoori tama na cuaqueyajaaja tarinitiaquiaari pocuara na mosaanura, tojetaarucujanaa jiyanooshano pa quiniuria pueyaracaanu. Naacujitij, na Que Pueyasoori juhua tojetaarucujanaa sesa miyashijacara pa jiyatequiaari, seetanujanaa na pueya pa quiniuria tama nerajaaja.

¹¹Israel pueyacuara secojonaa pueya poonijiosacari Pueyaso Secojoua tiajinia, nojoriiri pueyaracaanu seya puecooquia narta pueya miishanoocua sesa. Naajaa, naa nojori miishanoori maja seetanujanaa na tuujunu pueya miishano sesa.
¹²Saniniujia, Jesucristoori tama na cuaqueyajaaja tarinitiaquiaari pocuara na mosaanura niyacutesanojinia. Cunojunaari na mosaanu quiquiaari. Majaari socua na pacutesaanu quiniutianihua monu. Na casonuucua pa niti, puetunu nocua tiuujia pueya sesa miishanojunaari tojetaarucujanaa jiyanooshaaquia. Naa na tucatanu nuhuaji Pueyaso miiniu panishano pueratej, nojuajaari na Que miaquetajara cajiquiaari. ¹³Quiaritia tii sashiyari, Pueyaso cuaara na paraa shocotare puetunujanaaatiijia. ¹⁴Naa niquiriyatu pueyano mosaanuucuatej, puetunu nocua tiuujia pueyajanaari maninia mijiacara jatanishaaquiaa, tojetaarucujanaa maninia pa quiniuria, Pueyaso rupuejaca pa quiniuria pueyaracaanu. ¹⁵Pueyaso Sohuanucujaari naa pa niishitijuhua naa Pueyaso sequesacari tariucuaanu na rupaajinia:

¹⁶“Pa Jiyaniijia Pueyasoori naa sequeya: ‘Nio pa quishacari nuhuaji, janiyari tamaatia miiniutianiya cua saquiriojosano pueyani, quiarinio cua rupaacua nojori tiuushacari. Janiyari quiarinio cua rupaa nianutaniya nojori jiuujiaji-

niani, na tojjiaa nojori quiniuria. Naajuhua, janiyari juhua na naajiotanutaniya nojori niishitijajiniani. ¹⁷Janiyari puetunu sesa nojori miishanojanaa niyajetanutaniya seetanujanaa”.

¹⁸Naacujitij, sesa pa miishano jaara tari seetanujanaa jiyanooshano quiya, cunora, majaari tari na panishaanu seya puecoosaanura, sesa pa miishanojiniji pa jiyanooshaanura.

Pueyaso pa rupeere jeequesano poojiata

¹⁹Naacujiti cua panishano cuarta Pueyaso pueyanaa, quiaritia cutara pa naata pa puereyaquiniutia tiuquijionu Pueyaso Quishaquijianaa, Jesucristo shootenuucua na nanaca pocuara.
²⁰Nojuajaari quiarinio nucuaco pa jaatiaquiaa na Queecua. Nojuajaari juhua pocuaji nuunuquiaari Pueyasooocua. Mijiria Pueyaso Secojoua tiajiniani, Pueyaso Quishaquiiri shiquiaruque toqueta mishiquionucua quiquiaari, pueya tiuquitiaaquiinuria Pueyasooocua. Cuno shiquiaruque toque cutaraari sutequiaari Jesu cusosacari. Cunocujaari pa niishitiya, pocuajiiri juhua nuunusano quiya Pueyasooocua. Neyanu Jesucristocujaari cuno quiarinio nuu. Nocua pa tiuushacari, paari pueyaracaanu rishijacara jatanishaaquiaani juhua nojuajuhua. ²¹Nojuacujaari pocuara Secojonajanaa cutara. Na Que Pueyaso secojoquiaari puetunu Pueyaso muerasuucuarajanaa. ²²Cunora, Pueyasooocua pa catecanoriquia seetanujanaa pa paniniutia nojuaja. Nojuaja pa secojoriquia, seetanujanaa nocua pa tiuuniutia, maja quenaaja nocuaji pa taacanuunuta. Naa pa rupueriquia nojuaja, jatanishano jiuujia, juhua poojiaacua Jesu nanaca majiriutiasano quishacari. Naajuhua, puetunu sesa pa miishanojanaa cuaara jiyanooshano

quiiiria, naatej, taa pa cuaqueyacuaani, pa nanasacari maniniuniacu mohuacata.

²³Niaa jaara moojinia tiuquinijosaa-quiaari, niaari maninia pohuataquiaari pueya niquiara Jesuucua nia tiuuniujiniji. Nocua nia tiuushacari, niaacuaajaari niishiya puetunu Pueyaso sequesanojua-naari pajaniyara tohuateenutaniya, pueyaracaanu shuquiriaatia pa quiniuria nata. Majaari nia taacanunu nocuaji.

²⁴Parta Pueyaso pueyacia tacaajiaca pa quiriquia. Panijiaca pa quiniuria pa shiniujiutooriquia, maninia mijiaca pa quiniuriajuhuaj. ²⁵Noojiaqueya parta Pueyaso pueyari tari jiitiquiocanu maja na rerejonura narta Pueyaso pueyata. Majaari naa nia miiniujiuhuaj. Maninia cutaraari pueyaracaanu pa rerejonura parta Pueyaso pueyata, pa shiniujiutioonura. Naa pa miiriquia pueyaracaanu cutara, pa niishishacari pa Jiyaniijia tiuquiniuari tari catecanoya.

²⁶Nia niishiri pueyanaa, maatia pa niishiniu nuhuaji seetanu Pueyaso rupaajanaa, paa jaara saaja sesa mijioquiaa tama pa panishacarijaajani, ¿cantucua socua pocuara cusonu pacuterohua saajaniuhuaj? Shaaqui.

²⁷Naa sacuraatia mijiicani, nojori cuaara niishiiria, nojoriiri cocuaatia miya. Nojori jaara nojori jiuujia tacatoya-quiri sesa nojori miiniujiniji, nojoriiri jiyanohua saniitiosaanutaniya. Narta Pueyaso paraata cojiritiasaanutaniya quejoonu mani quiquiojiniaari pueyara-caanura. ²⁸Pueyano jaara Moisés Rootasano tojiyaquiquiaari, querajaa pueya jaara nocuara saquiriojotaquiaari, nojori sequesanoori seetanujuanaa quiquiaari. Naacuaajitij, majaari nocua na taraajenu quishaquiaari na mosaanura.

²⁹Moisés Rootasano tojiyashijiaca jaara naa miishaaquiaaricuaa, ¿paateeri jiyaniyanijia Pueyaso Niyanu soojeaca jiyanooshaanutaniya, na nanaca

shootesaanu jiyatejaca juhua najuhuana-ratej? ¿Noo pojoritiiri

jiyanooshaanutaniyajuhuaj, Pueyaso Sohuanuucua rimiaaquejaca sacuraa-tiatej? ¡Maja! Pueyaso Sohuanuuri nojori cumaquiniu paniriquiaa juucua. Jesu nanacacuaajaari Pueyaso jiyanootiquiaari nojori, Pueyaso pueya nojori quiniuria juucua. Naacuaajitij, Pueyaso Niyanu soojeaca pueyari socua jiyanohua saniitiosaanutaniya Moisés Rootasano tojiyashijiaca pueyajiniji. ³⁰Paacuaajaari tari tojiquiaari naa Pueyaso sequesanooni: “Janiyacuaajaari naminiani. Janiyari sesa mijiaca saniitionutaniyani”. Naa naajiotasaaquiaarijaariuhuaj: “Pa Jiyaniijia Pueyasoori na pueya nequesoreenutaniya”. ³¹¡Jiyanohua puereeta quiniutianiya cutaraari Pueyaso jiyanooni ruuretajaca pueyara, Pueyaso nequesoreesacari nojori!

³²Pueyanaa, tariucuaaanu naquiya nia miishaanu nia niishiriquia, niaa jaara shushajanaa Jesuucua tiuquiaari. Naa pueya miitiasacari naquiya niajaniyatej, niaari juhuajaniya rejeretaquiaari saaja.

³³Noojiaqueya niajaniyajinijioori cararaatia macatishaaquiaari. Niaari pueya niquiara naquiya miishaaquiaari-jiuhuaj. Niarta Pueyaso pueya niquishacari naa nia miishaanutej, nojoriiri na puereyaquiniutia nia cojiquiaari saaja, niaacua nojori taraajesacari. ³⁴Naajuhuaj, niarta Pueyaso pueyajinijinio jaara nujuatejosa-no quiquiaari nujuatejojuajinia, Jesu tojitiajaca nojori quiniucua, niaari nojoriicua tiuquijioquiaari, nojori nia cumanijanura nocua nia taraajenuucua. Naajuhuaj, nia paraa jaara nia jiitiasano casami riutiocojoquiaari tama nojoririjaaja, nojori soosano Jesu pueya nia quiniucua, niaari juhuajaniya nojoriria tarinitiaquiaari saaja. Niaari saaja shuquiriaatia quiquiaari nia niishishacari

niaari jiyocuacaanu jiitiaa socua maninia casaa cuno casamijiniji, pueya jaariutiasano najaniyajinijini. Cuno, Pueyaso jiitiasano niaaranoni, cunoori shaajeya-shijia casami cutara. ³⁵Naatej, taa juhuajaniya naquiya miiniu rejeretajaca nia quiquiaaricujani, Pueyaso sequesanoocua tiuujiaca nia quiniuucua, naa Pueyaso sequesanoocua tiuujiaca nia quiriquia pueyaracaanu. Pueyasocujajari jiyanohua maninia miiniutianiya nocua tiuuniu tarinitiaashijia. ³⁶Naquiya nia miishacari pueyaracaanu, juhuajaniya nia rejeretariquia saaja, maninia nia tucuatnura puetunu Pueyaso panishano nia miiniurijanaa. Naacujatij, niaari puetunu Pueyaso sequesanojuanaa masenutaniya, pueyaracaanu shuquiriaatia nia quiniuria. ³⁷Tariucuacaanu Pueyaso sequesanoocujajari naa naajiotsano quiya:

“¡Niaaj! ¡Quera tiuquiya pueyacua Niriqiano! Maja na tarishiniu.

³⁸Cua jiyanooshano pueyari pueyaracaanu rishijiacara jatanishaanutaniya saaja Quiyannuucua nojori tiuushacari. Saniniuujia, tamonu pueyano jaara nocua tiuuniu tarinitiare, nojuajajari cua soosano pueyano quiniutianiya”.

³⁹Cuno pojoriiri saniitiosocoriquiano seetanujuanaa. Pajaniya saniniuujia, paa cutaraari maja jiyano pueyajinijinioni. Paacujajari pa Jiyaniijiaacua tiuujiacani, pueyaracaanu nata pa quiniuria shuquiriaatia.

Pueyasooocua tiuuniujiniji pohuatasano

11 ¹Pueyaso sequesanoocua pa tiuushacari, paari niishiyani paari puetunu Pueyaso sequesanojuanaa masenutaniyani. Nocua pa tiuushacari, paari maatia niishiyani puetunu na sequesanojuanaa pajaniyarano pa

niquishoo casaani, cunoori seetanujuanaa quiya. ²Noojiaqueya pa supuetanaajinijinioori seetanujuanaa Pueyaso sequesanoocua tiuujiaca quiquiaari. Naaratej, Pueyasoori nojorijiniji naa sequequiaari: “Cuno pojorini, nojoriiri maninia cua pueya, cua sequesanoocua nojori tiuuniuucua seetanujuanaa”.

³Pajaniyara naajuhuaj. Tariucuacaanu Pueyaso Rupaacua pa tiuushacari, paari niishiyani Pueyasoori jiya shipiniquiaari saaja na pocuanuta. Naacujatij, puetunu pa niquishano casaajanaari shipinishaquiaari niquishoo casaajiniji.

⁴Supuetana Abel tiuuniuucua Pueyasooocua, Pueyasooocua na catijiasanoori socua maninia quiquiaari Pueyasora tarajanu Caín catijasanojiniji. Naa Abel tiuuniuucua Pueyasooocuatej, Pueyasoori na jiyatequiaari maninia na pueyano na quiniuria. Pueyasoori Abel catijasano timitiaquiaari, nocua Abel tiuuniuucua. Cunora, tarajanu Caínri Abel moquiaari. Naajaa, naa macu na quishacaritij, nojuajajari pa niishitiojiyaja Pueyasooocua pa tiuuniuria taa nojuaja tiuquiaaricuaani.

⁵Supuetana Enoc quiniuucua Pueyasooocua tiuujia, Pueyasoori puetunujuanaa na riquiaari jiyocuacaanu, mijiria na shaajeyaquiniuucujaj. Narta pueya pajesacari nojuaja, majaari tari na quiniu quiquiaari. Pueyasoori tari na riquiaari. Tariucuacaanu Pueyaso Rupaajinia, nojuajajiniiri pohuatashiyacuaja, Enocnaari Pueyaso timitijia pueyano quiquiaari mijiria na quishacarijia. ⁶Seetanujuanaari, paa jaara Pueyasooocua tiuyashijia quirini, majaari pa naata timitiniu Pueyaso. Naacujatij, cante Pueyaso niishiniuucua jiaatiaani, nojuaja cuaara tiuuria Pueyasoori seetanujuanaa quijia. Nojuaja cuaara tiuuriajuhuaj, Pueyasoori na secojonuuuaca tojiquiaa. Nojori panishano miiquiaa nojoririjajarihuaj.

⁷Pueyasoori supuetana Noé numoote-quiaari nojuajaari nio jiya pajaashitianiniutianiya, puetunu mijiria sesa mijiacajanaa na shaajanura. Pueyasoori na sequequiaarijiuhuj puereetuua buque na shipiniuria tii na tacatajara pajaacujaji. Jiyacaritij, Noeri maja na niishiniu quijia pajaa. Naajaa, Pueyaso sequesanoocua na tiuuniuucua, nojuajaari Pueyaso tojiquiaari. Naacuajitij, nojuajaari necocuata, puetunu necohuatajanaa cureequiaari, necohua niquiocohuatajuhuaj. Puetunu narta mijiria quijia pueyajanaari cusunuuquiaari pajaajinia, nojori tiuyaquinuucua Noé pohuatasanoocua Pueyasojiniji. Noé cutaraari juhua sesa miyashijara jiyatesaaquiaari pueyaracaanu Pueyasota rishijara na quiniuria, Pueyasooocua tiuujia na quiniuucua.

⁸Abrahamri Pueyasooocua tiuquiaarijiuhuj. Pueyaso sequesacari nojuaja tamonu jiyajiniara na pacunura, Abrahamri na tojiquiaari. Tama na jiyajinijiaaja na quiasacari, majaari na niishiniu quiquiaari tee cuniquiria na quiaani. Nojuajaari saaja niishiquiaari Pueyasoori na quijia na niquitionutaniya tama na jiyaranojuaja. ⁹Pueyaso niquitosocoriquiano jiyajinia na tiuquishacari, Abrahamri cuno jiyajinia quiquiaari juhua rucanejojua pueyano. Abrahamri juhuanajuaja maja cuno jiya camaru na quiniu quiquiaari. Naajaa, Pueyaso sequesanoocua tiuujia quiquiaari pueyaracaanuuri. Nojuajaari saaja seya cajacajiniji shitiasano suhuorotujinia quijia quiquiaari pueyaracaanu. Abraham niyanu Isaacri naa quijia quiquiaarijiuhuj, Isaac niyanu Jacobonio. Pueyasoori cuno pojori sequenu pacutequiaarijiuhua coteenujuanaa na sequesano Abraham. Naacuajitij, nojoriiri Pueyaso sequesanoocua tiuujia quiquiaari pueyaracaanujuhuj. ¹⁰Pueyaso jaara

Abraham sequequiaari, nojuajaari pueyaracaanu na quijiarano quiquio na niquitionutaniya, Abrahamri niishiquiaari Pueyasoori miriqui sequeriquiaa tama na shipinishano tiacajinijiaaja. Cuno pueyaracaanu rishijia tiacaari Pueyaso niishiriojosano tiaca na saquiriojosano pueyarano. Abrahamri cuno tiacara sashijia quiquiaari pueyaracaanu, Pueyaso sequesanoocua na tiuuniuucua.

¹¹Naajuhuj, seetanujanaa Pueyaso sequesacari Abraham, nojuaja na muetutenutaniya, Abrahamri jiyacari tariucua saaquiano quiquiaari. Neco Saaraari puera motaja quiquiaarijuhua na manajenura. Naajaa, Abrahamri niishiquiaari Pueyasoori cumaacaraca quijia na sequesano na tohuateenura. Naa Pueyasooocua na tiuuniuucuatej, Pueyasoori na cumaquiquiaari neco na manajonura. ¹²Naacuajitij, mueya shipiniyashijia saaquianoori mueya mueratequiaari. Cuno nyanuucuejainio supueno pueyari queraatiara canequiaari, queraatiata juhua riya, serojiaquishoo, juhua shoniniacu caminia shuriuquico paajia jaaquia.

¹³Puetunu cuno pa supuetanaajanaari Pueyasooocua tiuujiaaja shaajecoquiaari. Nojoriiri juhuanajuaja maja na jiitianu quiquiaari seetanujanaa Pueyaso sequesano nojori na niquitosocoriquiano. Naajaa, seetanujanaa nojori tiuushacari Pueyasooocua, nojoriria, Pueyaso sequesanoori juhua tariucua tucuaanuji nojori niquishano quiquiaari. Nojoriiri na timitiaquiaari juhua tariucua nojori jiitiasano. Naacuajitij, nojoriiri juhujaniya quiquiaari juhua rucojuaca nojori quishacari mijiria. Nojoriiri niishiquiaari, mijiria nio jiyani, majaari seetanujanaa nojori quiquiorano. ¹⁴Naacuajitij, paari niishiyani nojoriiri tamonu jiya jiitianuucua jiaatiariquiaa, pueyaracaanu nojori quiquiorano cutara. ¹⁵Nojori jaara saaja

mijiria jiya camaruhua quiniuria panijiaca quiquiaari, nojori maara na supuetujua jiyajiniara riujuuquiaariuhua. ¹⁶Saniniuujia, nojori cutaraari socua maninia jiya jiitianuucua jiaatiaquiaari, pueyaracaanu nojori quiquiorano cutara. Cunoori jiyocuacaanu quiquio, Pueyaso jeenucuasano nojoriria. Naaratej, majaari Pueyaso caririquiniu quiquiaari nojori sequesacari: “Pueyasoori canaa Jiyaniijia”. Nojuacuajaari tari jeenucuasano tiaca jiitiaa nojoririano jiyocuacaanu.

¹⁷⁻¹⁸Pueyaso sequesano Abraham na mueratesano mueya jaara tari mashajani-yojua quiquiaari, Pueyasoori Abraham saniquiaari, na niishiniuria nojuajate seetanujuanaa na tojjia. Naacuajitij, na sequequiaariiri cuaara na panishano niyanu moora, nocuara na catijasocori-quiano. Cuno neyanu Isaaccuajaari Pueyaso sequesano quiquiaari, nojuajiniji canenutaniyari queraatia pueya. Naajaa, Pueyaso sequesacari Abraham, neyanu na monura, nojuajaari maja na ruuretanu quiquiaari Pueyaso. Nojuajaari tari Pueyaso sequesanoocua tiuuriquiaa saaja. ¹⁹Seetanujuanaa Abraham tiuuniuucua Pueyasooocua, nojuajaari niishiquiaari Pueyaso na naata neyanu Isaac samiitia-niniuhua, nojuaja jaara na more. Naacuajitij, quera Abraham mosacari neyanu Isaac, Pueyasoori nocuaji na tenujuquiaari, tari maatia na niishishacari Abrahamri seetanujuanaa na tojjia. Naacuajitij, Abrahamri neyanuniyojua jaatucuquiaariuhua shuquiriaatia na quiquiojiniohuara, juhua macu samiitia-nishanohua. Naa Abraham miishanoni, cunoori miriqui quiya pajaniyara taa Pueyaso miiquiaari Neyanu quiai naatajacuaani.

²⁰Isaac tiuuniuucua Pueyasooocujahuaj, nojuaja jaara saaquiano quiquiaarijiuhuaaj, nojuajaari necohua

sequequiaari, Jacobo, Esaúnio: “Pueyasoori jiyanohua maninia miiniutianiya niaara, niaacuajinio supueno pueyano, taa na sequequiaari janiyacujani”.

²¹Jacoboori Pueyaso sequesanoocua tiuujia quiquiaarijiuhuaaj. Naacuajitij, quera na cusonu panishacari, nojuajaari neyanu José niquiohua sequequiaari: “Pueyasoori jiyanohua maninia miiniutianiya niaara, niaacuajinio supueno pueyano”. Naa na sequenu nuhaji na jiuhuatej, nojuajaari na natacaacua tanishiquiaari. Pueyaso secojoquiaari na timiniutiaari, na niishishacari Pueyasoori pueyaracaanu miiquiaa puetunu na sequesanojuanaa.

²²Jacobo niyanu Joseeri Pueyaso sequesanoocua tiuujia quiquiaarijiuhuaaj. Naacuajitij, quera na cusosacari, nojuajaari niishiquiaari Pueyasoori tamacari Israel pueya mashiquiniutianihua Egipto jiyajiniji. Naacuajitij, nojuajaari narta Israel pueya sequequiaari nocua nojori taraajenura. Nojuajaari nojori sequequiaari maja nojori tiujianura na nucuhua Egipto jiyajinia, nojori jaara quiojorohua Pueyaso niquitiosocoriquiano jiyajiniara.

²³Moisés queya quiniuucua Pueyasooocua tiuujia, nojoriiri Moisés jamoquiaari jaara shusha rasaaquiaari, mueya maniniuniyojua na quiniuucua. Naa na shocojoquiaariiri jiuujianaraca raca, pueyaracaanu jamosano na quishacari. Egipto jiyaniijia Faraónri tarijia sequequiaari, puetunu Israel pueya niquiocohua shusha roosano canuujuanaa cuaara moojinia quejoosaaria. Naajaa, nojoriiri cuno sequesano tojiyaquiquiaari nojori puereyaquiniutia saaja, Pueyasooocua tiuujia nojori quiniuucua.

²⁴Naajuhuaaj, Moisés quishacari tariucua cumantumaca, Pueyasooocua tiuujia na quiniuucua, nojuajaari na canashitinia Faraón* niyatu tamacaquiaa-

ri. Nojuajaari tama sequequiaarijiaaja: “Majaari Faraón jinianu cua quiniu paniniu. Janiyacuajaari Israel pueyano-ni”. ²⁵Egipto jiyaniijia jinianu na quiniuucua, Moisésri na naata juhuajani-ya miiniu quiquiaari puetunu na miiniu panishanojuanaa, shuquiriaatia na quiniuria. Naajaa, nojuajaari niishiquiaa-ri cuno shuquiriaatia quiniuuri saaja rupaquijia mijiria. Nocuaji, majaari na tamacanu quiquiaari narta Israel pueya, shuquiriaatia na quiniuria tamajaaja. Nojuaja cutaraari narta Israel pueyacua taaajequiaari, Egipto jiya jiyaniijia poonijiotenuucua nojori puera. Cunora, nojuajaari niishiriojoquiaari nojuaja cuaara cojiritiasaaria naquiya miishaanu narta Israel pueyatajuhuaj. ²⁶Pueyaso sequesanoocua tiuujia na quiniuucua, nojuajaari niishiquiaari Pueyasoori na tojitiajaca miiniutianiya maninia pueyaracaanu cutara. Nocuaji nojuajaari saquiriojoquiaari narta Israel pueyata soosano na quiniuria mijiria, maja puetunu Egipto casami jiitiaja na quiniuria mijiria, Faraón jinianu na quiniuucua.

²⁷Pueyaso sequesanoocua tiuujia Moisés quiniuucua, na nuhuaji, nojuajaa-ri Israel pueya jaatiaquiaari Egipto jiyajiniji. Majaari na puerenu quiquiaari Egipto jiya jiyaniijia juaashacari jiyano-hua. Seetanujuanaa Moisés tiuushacari na niquiyaquishoo Pueyasoo-cua, nojuajaari Pueyaso niquiquiaari noojiata, juhua na shuriucua quiyano pueyaracaanu. Naacuajitij, Moisésri tama na cuaqueyajaaja cumaquiquiaari maja na tarinitianura miiniu Pueyaso sequesano nojuaja. ²⁸Quera Israel pueya mashishacari Egipto jiyajiniji, Pueyasoori Moisés sequequiaari: “Janiyari niucua cua seru jiyaronutaniyani, cua tojiyashi-jiaca jiyapueranuhua na puecoonura puetunujuanaa. Nocuaji Israel pueya quia

numootere, borrego nanaca nojori shuquiujiutianura na tia tohuatheyaji, maja nia jiyapueranuhua cusojuasaanura-juhuaj”. Moisésri Pueyaso sequesanoocua tiuququiaari. Naacuajitij, puetunu Israel pueya jiyapueranuhujinijiniojuanaani, majaari quenaaja niquiriyatu niyanu mosaanu quiquiaari cutara.

²⁹Israel pueya mashishacari Egipto pueyacua ji juucua, Naatunacu jiyanisha-no caminiaari nojori ritiaquiaari saaja. Nocuaji, Pueyasoori caminia raquitia-quiaari nojori nuura. Na nuhuaji, Pueyasoori Moisés sequequiaari puetunu nojorijianaa cuaara niuutiaara caminia taquijiria. Israel pueya tiuuniuucua Pueyaso sequesanoocua, nojoriiri joojuashiquio niuutiaquiaari juhua puereetunu nucuco. Egipto jiya jiyaniijia soldadohua jaara juhua nojori niuutianu paniquiaarijiuhuj, nojoriiri saaja shushiniuquiaari.

³⁰Israel pueya tiquishacari Pueyaso niquitiosocoriquiano jiyajinia, nojoriiri na paraa Jericó tiaca shocua camarucu-neetaquiaari siete juuca, naatej, taa Pueyaso rootaquiaari nojori miiniuriacua-jani. Naa nojori tiuuniuucua Pueyaso sequesanoocuatej, Jericó tiaca shocua sohuacaari puetunu pojotaquiaarijianaa. ³¹Puetunu Pueyaso tojitiaashijiacajanaari puecoosaaquiaari. Rahab cutaraari jiyanooshaaquiaari. Rahabri naa jiyanooshaaquiaari Israel pueyajinijinio namenujunaa na jamojonuucua tarijia narta pueyacuaaji. Rahabri naa maninia miiquiaari Pueyasoo-cua tiuujia na quiniuucua. Naaratej, Israel pueyari cuno paanatu jiyanooquiaari.

³²¿Teyano pa supuetanaajiniji cua pohuatanutaniya niajaniya socuari? Socua queraatia pa supuetanaari Pueyasoo-cua tiuujia quiquiaari. Tariucua cua pohuatasano, maninia nia niishiniuria Pueyasoo-cua tiuujia

pueyari Pueyaso jiyanooshano. Naajuhua, majaari jeya cua quiniu cua pohuatanura maninia nio pojorijini: Gedeón, Barac, Sansón, Jefté, David, Samueljininio, socua narta Pueyaso sequesano caminiujiuniaa pueyajininio.³³ Pueyasocua tiuujiaa nojori quiniuucua, nojoriiri tamasaca jiyaniijianucua miaquejoquiaari na jiyajiniji. Pueyasocua tiuujiaa nojori quiniuucua, nojoriiri maninia jiyaniijianucua quiquiaari, maninia na jiitanura narta Israel pueya. Pueyaso sequesanoocua tiuujiaa nojori quiniuucua, nojoriiri Pueyaso sequesano nojori na niquitiosocoriquiano masequiaari. Pueyasocua tiuujiaa nojori quiniuucua, juurunu sareya rupaari juhua seecujutasaquiaari saaja, maja na soonura nojori.³⁴ Pueyasocua nojori tiuuniucua, nojori jaara manijinia quejoosaaquiaari, nojoriiri maja na catenu quiquiaari. Pueyasocua tiuujiaa nojori quiniuucua, nojoriiri na paraacua mashiquiaari saaja, maja na puecoosaa-nura nijiniaquetucua mueruuta. Pueyasocua tiuujiaa nojori quiniuucua, sasaca pueyari jiyanhua cumaacaraca quijiacara quiquiaari. Pueyasocua tiuujiaa nojori quiniuucua, nojoriiri jiyanhua cumaquishaaquiaari na paraa nojori miaquejonura, na paraa nojori mashiquiniuria nojori jiyajinijihua.³⁵ Naajuhua, Pueyasocua tiuujiaa maajipohua quiniuucua, nojori macuuri samiitiacoquiaariuhua nojoriria. Tamasacaari jiyanhua taraatia miishaaquiaari Pueyasocua tiuujiaa nojori quiniuucua. Cunora, nojori paraa jaara nojori quiooquiaari, nojoriiri puecoonura miananajosaaquiaari nojori jaara Pueyaso tojiniu tarinitiaaquiri. Nojori jaara na paraa sequesano tojiquiaari, nojori maara cartesaaquiaariuhua. Pueyasocua tiuujiaa nojori quiniuucua, nojoriiri saaja paniquiaari

nojori cuaara puecoosaariaqui, naajaa, jiyanhua naquiya na miiniutia. Nojoricuaajaari niishiquiaari, Pueyasoori nojori samiitianijionutaniuhua, jiyanhua shuquiriaatia nojori quiniuria pueyaraanura cutara.³⁶ Tamasaca quiniuucua Pueyasocua tiuujiaajuhua, nojoriiri cararaatia macaatishaaquiaari, jiyanhua majacusaquiaariiaariuhua. Naajuhua, tamasacaari cumayocua shipinishano casaata morojosaaquiaari. Nujuatejojuajinia nujuatejosaaquiaariiri.³⁷ Tamasacaari saitia jacusaquiaari na puecoosaa-nura. Tamasacaari na cajiniocua rashiquiojosaaquiaari jacaria jiyaratajata juhua juhua, socua jiyanhua naquiya na miishaanura. Naajuhua, tamasacaari nijiniaquetucua mueruuta puetujusaaquiaarijanaa piyonu. Naajuhua, tamasaca quiniuucua Pueyasocua tiuujiaajuhua, nojoriiri juhua taanuusanu rucoojoquiaari puetunu tiqiyocuaajanaa. Casamijiuniucua nojori quiniuucua, nojoriiri saaja borrego shoque, cabra shoque cusupuequiaari nojori cushishocoriquiano. Nojoriiri taraatia miitiasano quiquiaari, naquiya miishanojuhua.³⁸ Juhua taanuusano nojori quiniuucua, nojoriiri juhua tashuquioono rucoojoquiaari cariquia jiyajinia, tuhuananuhuaajinianio. Tiaajunucua nojori quiniuucua, nojoriiri saaja raaco maquiyonuuuaca quiquiaari. Mijiria quijiaa pueyari nojori jiyatequiaari juhua najuhua quijiaa pueyara. Naajaa, nojori cutaraari seetanujanaa Pueyaso timitiasano pueya quiquiaari, nocua tiuujiaa nojori quiniuucua.³⁹ Pueyasocuaajaari nojori jiyanooquiaari, seetanujanaa nojori tiuuniucua nocua. Naajaa, nojoriiri juhuanajuaja maja nojori masenu quiquiaari seetanujanaa Pueyaso sequesano nojori na niquitiosocoriquiano.⁴⁰ Pueyasoori nio pa

quishacari nojori sashitiyajaara, jiyanoehua maninia na miishacari pajaniya na Sohuanuta, Neyanu Jesucristoocua pa tiuuniuucua. Na nuhuaji, Pueyasoori puetunu nojoritijajanaa pa cojiritianutaniya jataniniu tojetaarucujajanaa maninia mijjiaca pa quiniuria, na shuriucua na rijiosacari puetunu pajaniyajanaa.

Jesu miishano pa niishiriojoriquia, naquiya rejeretajaca pa quiniurijahuaj

12 ¹Naa pa niishishacari taa queraatia pueya maninia miiquiaari Pueyasoocua tiuujica nojori quiniuucuaaani, cunora, tama pa cojetasano najuhuana casaa pa tarinitiaquia. Tarinitiahiyari puetunu najuhuana casaajanaa, teyanooocua pa cojequiaa Pueyaso panishano pa miyaquiniuriacua-jani. Naajuhuj, puetunu sesa miiniujianaa pa tarinitiare, puetunu pa cumaacajanaa pa jiitianura, juhuajaniya rejeretajaca pa quiniuria. Naacuajiti pa naata maninia tucuatunu puetunu Pueyaso panishanojuanaa pa miiniuria. ²Jesu miishano pa niishiriojoriquia pueyaracaanu. Nojuajaari tojetaarucujajanaa na Que Pueyasoocua tiuujia quiquiaari. Nojuajaari niishiquiaari, naquiya na miiniu nuhuaji, na Queeri jiyanoehua shuquiriaatia quijiara na jiyatenutaniya. Naaratej, nojuajaari juhuajaniya rejeretaquiaari naquiya na miiniu niyacutesanojinia, cararaatia na miishaanujuhuj. Cunora, nojuajaari na Que miaquetajara cajiya, Jiyaniijiajanaa na quishacari.

³Majaari nia niyajetanu taa Jesu rejeretaquiaari juhuajaniyacuaani, pueyaracaanu sesa mijjiaca paracaashacari nojuaja. Nocua nia niishiriojoriquia, niaa mariqui Pueyaso tojinu tarinitianu paniriiri nia taraajenuta naquiya nia miishacari. ⁴Niaacuajaari naquiya

miishaaquiaa, Jesucristoocua tiuujica nia quiniuucua. Naajaa, majaari pa Jiyaniijia nia tacartanu, naquiya nia miyaquishaanuucua. Nia rejeretariquia saaja. Majaari juhuanojuaja nia puecoosanu quiquianu na tojitijaca nia quiniuucua. ⁵¿Niaateeri Pueyaso rootasano niyajetarucuaa tari, na rootasano pajaniya juhua necohuaja? Naa sequeyari:

“Quiyanunaa, majaari cua rootasano quia soonu, janiya jaara quia niishitiojiya naquiya cua miitishacari quiajaniyani. Janiya jaara quia nacasure socua maninia mijji quia quiniuriani, majaari cucuaji pishiniu. ⁶Quia Jiyaniijia cua quiniuucua, janiyacuaajaari cua panishano pueyano jiuujiyashijiani sesa na miishacari. Naajuhuj, janiyari cua niyanura cua jiyatesano pueyano saniitiojuani jaara sesa miiriquia”.

⁷Naaratej, juhuajaniya na rejeretajaca nia quiriquia. Pueyasoori juhua necohua nia niishitiojiya, maninia na canashitiniuria nijaniya, seetanujuanaa necohua nia quiniuucua. ¿Pueyanoteeri nareja niqijia neyanu, neyanu jaara na tojiyashijia quiriquia? ¡Maja! ⁸Naajuhuj, Pueyasoori puetunu necohuarajanaa na jiyatesano pueya saniitioquiaa sesa nojori miishacari. Naacuajitij, Pueyaso jaara nareja niquiriquia nijaniya sesa nia miishacari, cuno maara quiri maja seetanujuanaa necohua nia quiniuucua, juhua tamonu queecuajinio nia quishacari. ⁹Naajuhuj, naatujoori pa quishacari, pa queyari pa majacujua, nojori pa tojiyaquishacari. Majaari cunora nojori rerequetejaca pa quiniu quiquiaari. Naacuajitij, pa Que Pueyaso jaara pa saniitioriquia, ¿paateeri na rerequetenutaniyani? ¡Maja! Nojuacuajaari seetanujuanaa pa sohanu Que, pueyaracaanu rishijaca pa

quiniuria. ¹⁰Pa queyari pa canashitijio-
quiaari taa nojori paniquiaaricuajani.
Nojori rootasacari pajaniya, nojori
saniitiosacari pajaniya, cunoori quiquiaa-
ri saaja mijiria pa quiniuria maninia. Pa
Que Pueyaso saniniuuja, nojuajaari pa
saniitioquiaa seetanujuanaa maninia
mijiacara pa quiniuria, juhua nojuaja pa
quiniuriajuhuaj. ¹¹Seetanujuanaa,
puetunu saniitonujuanaari taraatia
pajaniyara. Majaari pa timiniu paa jaara
majacusaareni. Naajaa, na nuhuaji, paa
jaara na ruuretaquirini, paari socua
maninia mijiaara jatanishaaquiaani, socua
Pueyaso tojijiara pa quiniuria juhuajani-
yajuhuj.

**Jiyanohua cocuaatiaari Pueyaso pa
tojiaquishacari**

¹²Naacuajitij, majaari nia pishiniu
pueyanaa, Pueyaso saniitiosacari
niajaniya. Nocua nia tiuuri saaja. Nioojia-
ca nia cumaquiriohua. ¹³Saaja Jesucristo
rupaa tojijiaca nia quiri, jatarinitiaja
Pueyasocua tiuujiaca mariqui noojia
niquijiotereeri. Nojori cuaara saniya
cumaquishano quiriara cutara.

¹⁴Tama nia cuaqueyajaaja nia cumaqui-
riquia, juhuajaniya quijiaca nia quiniuria
puetunu pueyatajanaa. Majaari juayonu-
jutanu. Nia saniriquia seetanujuanaa sesa
miyashijiaca nia quiniuria. Saaja noo
pojori cutaraari pa Jiyaniijia niqiniutia-
niya, seetanujuanaa maninia mijiacara
jatanishano pueyatej. ¹⁵Pueyasocuaajaari
pa jiyanoojia. Tama nia cuaqueyajaaja
nia cojuare niaa mariqui Pueyaso
ruuretareeri na naacunu panishacari
niajaniya. Nojuajaari cumaacaracacuja
na cumaquiniuria niajaniya nia panisha-
cari. Naacuajitij, niarta Pueyaso pueyano
jaara juaatishaare tamonu miiniucua
sesa nojuaja, nojuaja nia naacure na
jiyanooniuria sesa na miinia. Jaara naa
miyaquiritij, cuno pueyano juaaquiacaari

narta pueyacua paaquenutaniya na
sesonura queraatia pueya. ¹⁶Naajuhuj,
tama nia cojuatooriquiajaaja. Naa nia
miitiooriquia tamonu niajanijajiniinio
mariqui Pueyaso sequesano na niquitoso-
coriquiano pajaniya soojeara quiriiri,
saniya tama na cuaqueyajaaja na
shuquiritiniuria mijiria. Supuetana
Jacobo puerana Esauucuaajaari naa
miiquiaaritij. Tamacari na miaajesacari,
nojuajaari Jacobo sequequiaari: “Cua
tarajanunaa, pa que niquitosocoriquiano
janiya, na jiyapueranu cua quiniuucua-
ni, cuno cuaara quiriara quiaa jaara
quia sumatuujiniji rupore quiria.
Jiyanohua miaajeyanijia”. ¹⁷Niaacuajaari
niishiya, na nuhuaji, Esauuri paniquiaari
na que secojonura nocuara, jiyanohua
maninia Pueyaso miiniuria nojuaja, na
que jiyapueranu na quiniucua. Na
queeri na ruuretaquiaari saaja. Esauuri
jiyanohua na que nenecojoquiaari na
nujuquenuta. Naajaa, na queeri maja na
naata jataniniu quiquiaari tariucua
neyanu Jacobo na sequesano Pueyaso
niquiaara.

¹⁸Nio pa quishacari, pajaniyara,
Pueyasoori maja juhua tariucuaaanu na
quishacari pa supuetanaa Israel pueyata.
Jiyacaritij, Pueyaso jaara Moisés
tacaniquiaari Sinaí tuhuananuucua,
Moisés na niishitiojonura na rootasano na
pueyara, tuhuananuuri jiyanohua
puereeta niquishano quiquiaari.
Tuhuananuuri puereeta noshiriquiaa. Na
najacaari tacariquiaa mueruucatej.
Jiyanohua ninishiquiiri quiriquiaajuhuj.
Paratuuri jiyanohua piyarojoriquiaa
puereetajuhuaj. ¹⁹Trompeta jonenenu-
nuuri jiyanohua tojishaariquiaa. Pueyaso
pocuanuuri jiyanohua tojishaariquiaaju-
huaj. Israel pueya tojishacari Pueyaso
pocuaano, nojoriiri jiyanohua pueretu-
quiaari. Naaratej, nojoriiri Moisés
sequetuquiaari maja socua Pueyasojua-

naa pocuanura nojoricuara. ²⁰Nojoriiri maja socua na rejeretanu quiquiaari puera puereeta Pueyaso sequesacari nojori. Pueyasoori jiyacari naa sequeriquiaa nojoritij, cuno tuhuananuucua nojuajanaa quiniuucua:

“Cante nio tuhuananu rupueyani, cuno pueyano cuaara mosaaria saitia jacusano, cashanata soj. Naa mijia seru cuaara naa puecoosariajuhuaj”.

²¹Puetunu Israel pueya niquishanojuanaari jiyanhua puereeta quiquiaari seetanujanaa. Moisésjanaari na puerequiaarijuhuaj. Nojuajaari na puerenuta sequequiaari: “Cua puerenuta teteaanijia”.

²²Nio pa quishacari saniniuujia, majaari pa catecanonu quiquiaa cuno tariucuacaanu pueya pueresano tuhuananuucua. Jesucristo cusunuucua pocuara, paari Pueyaso quiquiojinianaa tiuquitiaaani. Cuno na quiquio sesaari miriqui sequeshiya “Sión* tuhuananu”. Na pueya pa quiniuucua, nojuajaari jiyocuacaanu pueyaracaanu pa quijiarano tiaca jiitiaa. Cunoori seetanujanaa jiyocuacaanujinio Jerusalén tiaca. Naacuajitij, paari jiyanhua queraatia Pueyaso seya rupuequiaani, Pueyaso pa maninihuaqueetanura nojoritajuhuaj.

²³Paari tii rerejonutaniya puetunu parta Pueyaso pueyatajanaani. Pueyaso saquiriojosano pueya pa quiniuucua, pa sesacaari jiyocuacaanu Pueyaso nequesoreetuneejinia naajiotasano quiya. Paari Pueyasooqua catecanoquiaani. Nojuajaari puetunu pueya nequesoreenajanaa. Jesucristo niyacarijia Pueyasooqua tiuujiaa sohuanuhuaj tii quiyajuhuaj, canapue Pueyaso jiyatequiaari tojetaarucujanaa sesa miyashijiacaracujani.

²⁴Jesucristoori tii quiyajuhuaj. Nojuajaari tama na cusunutajaaja Pueyaso jiyanooti-quiaari nocua tiuujiaa. Tama na

nanacajaaja na shootenuucua pocuaraju-huaj, paari cunota jeequejosaquiaari tojetaarucujanaani. Naacuajitij, Jesu nanacaari jiyanhua socua maninia Abel nanacajiniji. Cafi monuucua tarajanu Abel, Abel nanacaari Pueyaso shiniujiya na mona cuaara mosaariajuhuaj. Jesucristo nanaca saniniuujia, cunoori Pueyaso pa jiyanooti-quiaacujia.

²⁵Cunora pueyanaa, tama nia cuaqueyajaaja nia cojuare maja nia ruuretanura Jesucristo Rupaa. Tariucuacaanu, pueyari jiyanoaquishaaquiaari nojori ruuretasacari Pueyaso sequesano, nojuaja jaara nojori piriyojoquiaari Sinaí tuhuananujiniji. Nojoriiri jiyanoaquishaaquiaari nojori tojiyaquiniuucua mijiria Pueyaso quishacari na sequesano. Nojori jaara naa jiyanoaquishaaquiaaricuaa, nio pa quishacari saniniuujia, zpaatucua taa jiyanooshaariquia pa ruuretasacari Pueyaso quiarijiani, jiyocuacaanuji na piriyojosacari pajaniyani? ²⁶Pueyaso pocuasacari Sinaí tuhuananujiniji, jiyari na pocuasacari tetequiaari. Quiarijia saniniuujia, Pueyasoori seetanujanaa sequeya: “Janiyari socua caminiutianihua jiya jiuuquiutianuni. Maja saa jiyaja. Jiya cajiniocuanio. Jiyacunojuanaari quiniutianiya naa cua miiniu”. ²⁷Naa na sequesacari taa socua na caminiutianihua jiya jiuuquiutianuni, naacuajiti paari niishiyani, puetunu na shipinishano casaajanaari shaajeyaquishaquiji shaajenutaniya. Saaja noo casaari cureenutaniya, maja na naata pootiosano casaatej. ²⁸Quiarinio quiquio, Pueyaso shipinishano na niqitiosocoriquiano pajaniyani, cunoori maja na naata shaajasaanu quiniutianiya cutara. Paari jiyaniujanucua quiniutianiya tii pueyaraanuni. Pa Pueyasoori jiyanhua maninia miiniutianiya pajaniya. Cunora pa shuquiritiare nojuaja. Paari na shuquiritiyani pa timitiasacari nojuaja.

Naacuajitij, nojuaja pa timitiare jiyanoehua pa paniniutia nojuaja, pa puerenutano. ²⁹Nojuajaari puereta mani, Neyanu ruuretajaca shaajaja, sesa pa miishano catijiajajuhua.

Taa pa miyani Pueyaso pa timitiniuria

13 ¹Majaari panitioonu nia tarinitia-nu. Naa Pueyaso pueya nia quiniuucuatej, pueyaracaanu panitioojua-ca nia quiriquia. ²Naajuhua, majaari rucoojua ruuretanu, niaacua nojori tiuquishacari. Nojori panijia nia quiriquia. Noojiaqueya pa supuetanaaji-nijiniocujaaari Pueyaso seya masuuquiaari na tiacora, nojori jiyani-sha-cari nareja pueyano naasucua.

³Njuatejosano pueyacua taraajejaca nia quiriquia. Tama nia cuaqueyajaaja nia jiyatere juhua nojoritia njuatejosa-nojuhuaj, nojoriicua nia taraajenura seetanujuaana. Naquiya miitiasano pueyacua taraajeja nia quiriquiajuhua. Nia niishiriquia, niaari na naata naa miitiasaanujuhua.

⁴Pueyasojuanaacujaaari pa niishitio-quiaari pa camitioonura. Cunora, camitioonu pueya cuara saaja neyacata, necocuata quijia quiiria. Cante camiyo-juani, nojuaja cuara tama na cuaqueyajaaja cojuara maja narta pueyano niquiocua na numuetacunura, na camishoo maajinio. Nia niishiri, Pueyasocujaaari naa sacuaraatia miijiaa saniitionutaniya.

⁵Majaari cumaneeca porocua nia quiniu tama niaarajaaja nia jiitianura. Juhuaianiya quijia nia quiriquia nia jiitiasanota. Nia niishiri, Pueyasocujaaari sequequiaari: “Majaari cua cartenu quiniutianiya niajaniya juhua japueyojua nia quiniuria. Majaari quenaaja cua tiujianu quiniutianiya niajaniya”. Cunora pueyanaa, maja nia tacaaniu. ⁶Naa seetanujuaana na sequesanoocua pa

tiuushacaritij, pa naata sequenu taa supuetana David naajiotaquiaari na sequesanoocujani. Naa sequequiaariiri:

“Jiyaniijia Pueyasocujaaari cua naacuna. Naacuajitij, majaari cua puerenu quiniutianiya. Majaari pueyano na naata taa miiniu janiya”.

⁷Coteenujuanaa nia jiitianaa pueya nia niishiriojoriquia, noo pojori canapuate shushajanaa nia tojitioquiaari Pueyaso rupaacuajani. Nojoriiri seetanujuaana Pueyaso tojjia nia quiquiaari, Jesucristoo-cua tiuujiaca nojori quiniuucua. Juhua nojori quiniuucua jiaatiajaca nia quiriquiajuhua, taa nojori quiquiaari-cuaani.

⁸Taa quijia Jesucristo quiquiaari tariucuaaanuni, nojuajaari naa quiyajaa. Naa quiniutianiya pueyaracaanuuri. Majaari na jatanu. ⁹Naaratej, majaari tamaatia niishitiojosano nia tojinu. Miaquenu pueresanojiniji niishitiojosano cutaraari najuhuanaj. Cunoori maja quenaaja na cumaquiniu quiquiaari na tojitiajaca. Naajuhua, majaari pueyacuara secojonaa jiuujia cumaquishaanu quiquiaari nojori miaquesacari Pueyasora-no puecoosano seya shujiniji. Pueyaso Sohanu cutaraari poojia cumaquiquiaa, panijia nia quiniuria. ¹⁰⁻¹¹Saniniuujia, pueyacuara secojonaa jiyaniijiaari maja noo shu na miaquenu quiquiaari cutara, Israel pueya jiyanooshaanura puecoosaa-quiaaritij. Pueyacuara secojonaa jiyaniijiaari cuno seya nanaca tiuquitia-quiaari Pueyaso Quishaquijianaa puetunu marijarajanaa, cuno nanaca na majiriuu-tianura tii. Na nanaca shootesano seruuri saniniuujia tiacajiniji jiyatasaaquiaari mij, tii na catijiasaanura puetunujuaana. Pueyacuara secojonaa jiyaniijiaari tojetaarucujanaa tenujusaquiaari maja na miaquenura cuno shu. Nio pa quishaca-ri saniniuujia, paari jiyanoehua

cumaquishaaquiaani Jesucristo cusonuu-
cua pocuara. Cunojiniji, paari
seetanujanaa Pueyaso rupesano
quiyacuajani. ¹²Naajuhuj, Jesucristo
mosaanura pocuara, nojuajaari Jerusalén
tiacajiniji jiyatasaaquiaarijuhuaj, naatej,
taa na nanaca shootesano seya jiyatasaa-
quiaari tamaquiriacuaani. Nojuajaari naa
tama na cuaqueyajaaja tarinitiaquiaari na
mosaanura, tojetaarucuajanaa jeequesano
pa quiniuria puetunu sesa pa miishanojini-
jijianaa. ¹³Nojuajaari jiyanoehua cararaatia
teetsaaquiaari niyacutesanojinia pa niti.
Naa Jesu miiniuucua pocuaracuaatej,
Pueyaso niishiyashijiaca jaara cararaatia
miiriquia pajaniya Jesuucua pa tiuuniu-
cuani, juhuajaniya na rejeretajaca pa
quiriquiajuhuaj. ¹⁴Pajaniyara, Jesuucua
tiuujiacani, nio jiyari maja pa quiquio.
Mijiria, shaaquiiri pueyaracaanu rishijia
quiquio pajaniyarano. Cunora, paari
jiyocuaaanu pajaniyarano Pueyaso
shipinishano tiacaacua jiaatiaani. ¹⁵Naa
Pueyaso jiitianuucua pueyaracaanu
rishijia quiquio pajaniyaranotej, nojuaja
pa timitiariquia pueyaracaanu. Neyanu
Jesucristo quiniuucua pocuara Secojona,
nojuajaari pa tiuquitiaquiaa na Queecua.
Nio pa quishacari quiarijiani, majaari
Pueyaso paniniu pa seya nanaca.
Nojuacuajaari paniquiaa pa shuquiritanu-
ra nojuaja cutara. Naacuaajitij, pa rupaa pa
jiyaterere Pueyasora na quiniuria saaja,
pueyaracaanu nata pa maniniuhuaqueeta-
nura nojuaja. Cunocuajaari na panishano.
¹⁶Naajuhuj, majaari nia niyajetanu
maninia nia miiniuria niarta Pueyaso
pueya. Nojori jiitiaaquishacari nojori
panishano, nia jiitiasano casaajiniji nia
niquitiojoriquia nareja nojori. Paa jaara
naa miijiaca quirini, paari juhua Pueyaso-
ra pa casaa niqitioyoni. Cuno cutaraari
na timitiquiaa.

¹⁷Cuarta Pueyaso pueyanaa, nia
jiitianaa tojitiajaca nia quiriquia. Majaari

nojori niishitiojosano nia ruuretanu.
Nojoricuajaari nioojiaca cojuaquiaa
pueyaracaanu, nojori niishishacari
Pueyasoori nojori nequesoreenutaniya
nia jiitiajaca nojori quiniuucua. Naaratej,
shamaatia nojori tojitiajaca nia quiriquia
maninia, Pueyaso nojori pohuatanura
shitimia niajaniyajiniji. Naa jaara nojori
tojitiaashijiaca quiri, nojoriiri Pueyaso
pohuatanutaniya na taraajenuta
niajaniyajiniji. Jaara naa quiriritij, niaa
cutaraari taraatia quiniutianiyajuhuj.

¹⁸Canaacuara nia secojonuuriquia.
Canaacuajaari saaja maninia miiniuria
saniniujuquiaa pueyaracaanuni. Naacua-
ajitij, canaa jiuujiaari panaatia quiya
Pueyaso niquiara. ¹⁹Janiyari jiyanoehua
paniyani cucuara nia secojonura, Pueyaso
tiuquitiniuhuara ritia janiya niaacua.

**Nio naajiona panishacari maninia Pueyaso
miiniuria pueya, na saruhuatasacari
pueyajuhuj**

²⁰Jesucristo shootenuucua na nanaca
pocuara, paari niishiyani puetunu
Pueyaso sequesanojuanaari seetanujua-
naa pajaniyarano quiniutianiya
pueyaracaanu. Naa Jesucristo miishano-
cua pa tiuushacaritij, na Que Pueyasoori
pa jiyanooquiaa, juhuajaniya pa rupe-
nuera nojuaja. Pueyasojuaanaacuajaari pa
Jiyanijia Jesucristo samiitianiquiaari-
hua macujiniji. Nojuacuajaari pa cojuana,
na panishano pueya pa quiniuucua.
iJiyanoehua maninia pa Pueyaso! ²¹Neyanu
Jesucristoocua nia tiuuniuucua,
nojuaja cuaara jataniiria niajaniya
tojetaarucuajanaa jeenucuasano nia
quiniuria, taa na paniyacuajani. Nojuaja
cuaara naa miiria niajaniyatej, maninia
nia tucuatunura puetunu na panishano-
juanaa. iPa Jiyanijia Pueyaso cuaara
pueyaracaanu shuquiritiasaaria
jiyanohua maninia na quiniuucua!
Cuaara naa quiiriatej.

²²Cuarta Pueyaso pueyanaa, jiyanoehua nia secojiyanijia maja nia ruuretanura secaja rupaata cua shiniujiushacari nijaniya nio cua naajiojinia. ²³Nia niishiri pueyanaa, parta Pueyaso pueyano Timoteori nujuatejojuajiniji tari tohuatesaarohua-cuaa. Nojuaja jaara tarishiyaquiri cucua na tiuquiniuria, janiyari cucua na

ruponutaniyani nia niquiniuucua cua quiasacari.

²⁴Naajuhuaaj, quiria nia saruhuatare puetunu nia jiitianaa pueyajanaa, puetunu cuniqui quiniaa parta Pueyaso pueyajanaanio. Italia jiyajinijinio parta Pueyaso pueyari nia saruhuataajuhuaaj.

²⁵Pueyaso cuaara na Sohuanuta cumaquiiria puetunu nijaniyajanaa.